



古香齋鑒賞袖珍施註蘇詩卷之十

商邱宋 榮

長洲顧嗣立

滄陽張榕端

閱定 毗陵邵長蘅

商邱宋 至

詩三十七首 時守高密作

贈上天竺辯才師

蘇子由辯才法師塔銘畧云師姓徐氏名元淨字無象於潛人生而右肩肉起如袈

裝條八十一日乃滅十歲出家二十五賜紫及辯才號及其終實八十有一沈公邁治杭命住上天竺增室幾至萬礎重樓傑閣冠於浙西後退居龍井東坡守杭作亭風篁嶺上名過溪亦曰二老此詩疑倅杭日所作誤竄此卷

南北一山門上下兩天竺中有老法師瘦長如鶴鵠不知修何行碧眼照山谷見之自清涼洗盡煩惱毒坐令

一都會男女禮白足我有長頭兒角頰時犀玉四歲不知行抱負煩背腹師來為摩頂起走趁奔鹿乃知戒律中妙用謝羈束何必言法華佯狂啖魚肉

白樂天寄天竺師詩一山門作兩山門兩寺元從一寺分唐裴寬傳寬衣碧瘡而長號碧鶴雀碧眼白足注並見七卷後漢賈逵傳自為兒童常在太學諸儒為之語曰問事不休賈長頭國語鄭史伯曰今王惡角犀豐盈後漢李固傳貌狀有奇表鼎角犀足履龜文韓退之送僧澄觀詩有僧來訪呼使前伏犀插腦高頰顛摩頂用徐陵侯寶誌事詳六卷席上人贈別詩注子由塔碑子瞻中子迨生三年不能行請師為落髮摩頂晉唐彬傳身長八尺走及奔鹿王注京師開寶寺僧俗姓張好誦法華經故呼張法華其言語散亂不經故亦呼為風法華又蘇州義師狀如風狂好活燒鯉魚不待熟而食之

游廬山次韻章傳道

塵容已似服轅駒野性猶同縱壑魚出入巖巒千仞表較量筋力十年初雖無窈窕驅前馬還有鷗夷挂後車

莫笑吟詩淡生活當令阿買為君書

孔稚圭北山移文抗塵容而走俗狀溪灌入傳高起劫轅下駒王褒傳復聖主得賢臣頌云翼乎如鴻毛遇順風沛乎如巨魚縱大壑晉王衍傳嚴嚴清時壁立千仞揚雄方言秦晉閒美狀為窈窕閑都也美心為窈言幽靜也廣禮有執燭前馬國語句踐甲事夫差親為夫差前馬王注言官伎引馬也鷗夷詳七卷胡穆秀才遺古銅器詩注詩話表令公夜宴公索聯句元白有得色至楊汝士曰昔日蘭亭無艷質此詩金谷有高人白知不能加遽曰笙歌鼎沸勿作此冷淡生活元曰樂天可謂能保其名也元乃微之韓退之贈張秘書詩阿買不識字頗知書八分詩成使之寫亦足張吾軍注或問魯直阿買是退之何人答云退之姪必有據而云

廬山五詠

盧敖洞

圖經敖泰博士避難此山遂得名

上界足官府飛昇亦何益還在此山中相逢不相識

韓退之酬廬給事詩天門九扇相當開上界真人足官府李太白通塘曲相逢不相識出沒繞通塘

飲酒臺

博士雅好飲空山誰與娛莫向驪山去君王不喜儒

史記秦始皇葬驪山又三十五年諸生四百六十餘人皆坑之咸陽衛宏古文官書序秦始皇密令冬種瓜於驪山谷中温處瓜實成詔博士諸生說之人人各異使往視之為伏機從上填之以土皆壓死今新豐温湯處號愍儒鄉見漢書儒林傳註漢鄼食其傳初見沛公騎士曰沛公不喜儒

聖燈巖

石室有金丹山神不知祕何必露光芒夜半驚童稚

三泉

皎皎巖下泉無人還自潔不用比三星清光同一月

詩國風綢繆束薪三星在天王注傳曰明星之多不如一月之光

障日峯

長安自不遠蜀客苦思歸莫教名障日喚作小峨眉自公

注其狀類峨眉但小耳

晉明帝紀帝年數歲元帝坐置膝上因長安使來問曰汝謂日與長安孰遠對曰長安近不聞人從日邊來元帝異之明日宴羣僚又問之對曰日近元帝失色曰何乃異向者之言乎對曰舉頭見日不見長安由是益奇之李白登鳳皇臺詩總為浮雲能蔽日長安不見使人愁古樂府石崇作思歸引

次韻章傳道喜雨

公自注禱常山而得

去年夏旱秋不雨海畔居民飲鹹苦今年春暖欲生蠶地上戢戢多於土預憂一旦開兩翅口吻如風那肯吐

前時渡江入吳越布陣橫空如項羽公自注去年歲錢塘竟飛蝗自西北來極可畏農

夫拱手但垂泣人力區區固難禦撲緣鬣毛尾困牛馬

啖齧衣服穿房戶坐觀不救亦何心秉畀炎火傳自古

荷鋤散掘誰敢後得米濟饑還小補常山山神信英烈

搗駕雷公訶電母應憐郡守老且愚欲把瘡痍手摩撫
山中歸時風色變中路已覺商羊舞夜牕騷騷鬧松竹
朝畦泣泣流膏乳從來蝗旱必相資此事吾聞老農語
庶將積潤掃遺孽收拾豐歲還明主縣前已窖八千斛
公自注今春及今得蝗子八千餘斛率以一升完一畝更看蠶婦過初眠公自注蠶一眠則蝗不復生矣
未用賀客來旁午先生筆力吾所畏蹠踏鮑謝
跨徐庾偶然談笑得佳篇便恐流傳成樂府陋邦一雨
何足道吾君盛德九州普中和樂職幾時作試向諸生
選何武

唐韻蠶蝗子也左傳宣十五年冬蠶生漢縣布傳上望布雷雷陣如項籍軍上惡之撰緣字出莊子詳三卷次韻王誨夜坐詩注北史後秦右驍騎督木皆盡牛馬

至相噉毛姚崇傳謂倪若水曰今坐觀蝗食苗忍而不救因以無年刺史其謂何
詩小雅田祖有神秉畀炎火朝野僉載唐開元四年河南北蝗蝻為災救遣使與
州縣驅逐採得一石者與石粟一斗者粟亦如之掘坑埋之唐十道四蕃志密州
常山齊時祈雨常應因以為名王充論衡畫雷公左手引連鼓右手椎之續仙傳
東王父與玉女投壺有不入者天為之笑則電後漢王郎傳元元瘡痍已過半矣
家語童謠曰天將大雨商羊鼓舞五行志旱則魚螺變為蟲蝗漢霍光傳使者旁
午注一縱一橫為旁午采鮑昭齊謝眺與徐陵庾信前後以詩文鳴於南朝前漢
禮樂志武帝立樂府采詩夜誦有趙代秦楚之謳漢王褒傳益州刺史王褒欲宣
風化於眾庶聞褒有俊材使作中和樂職宣布詩選好事者令依鹿鳴之聲習而
歌之時汜鄉侯何武為童子選在歌中久之武等學長安歌太學下轉而上聞宣
帝召見武等觀之皆賜帛謂曰此盛德之事吾何足以當之

謝郡人田賀二生獻花

城裏田員外城西賀秀才不愁家四壁自有錦千堆珍
重尤奇品艱難最後開芳心困落日薄艷戰輕雷公自注昨日雷
雨老守仍多病壯懷先已灰殷勤此粲者公自注賀攀折獻花三朵

為誰哉玉腕揜紅袖金樽瀉白醅何當鑷霜鬢強插滿頭回

唐百官志太宗省內外官定制為七百二十員曰吾以此待天下賢材足矣然是時已有員外置漢賈誼傳河南守聞其秀才召置門下楊巨源看花詩一林堆錦映千燈詩國風三英繁兮又見此祭者國語獸二為羣人三為衆女三為祭社牧之醉題金鑷洗霜鬢又九日詩菊花須插滿頭歸

惜花

吉祥寺中錦千堆公自注錢塘花最盛處前年賞花真盛哉道人勸

我清明來腰鼓百面如春雷打徹涼州花自開沙河塘

上插花回醉倒不覺吳兒哈豈知如今雙鬢摧城西古

寺沒蒿萊有僧閉門手自栽千枝萬葉巧剪裁就中一

叢何所似馬腦槃盛金縷杯而我食菜方清齋對花不

飲花應猜夜來雨雹如李梅紅殘綠暗吁可哀公自注錢塘吉祥寺

花為第一壬子清明賞會最盛金盤綠藍以獻於座者五十三人夜歸沙河塘上觀者如山爾後無復繼也今年諸家園圃花亦極盛而龍興僧房一叢亦奇但衰病牢落自無以發興耳昨日雨雹如此花之存者有幾可為歎息也

南京羯鼓錄明皇嘗遇二月初宿雨始晴景色明媚小殿亭內柳杏將吐歎曰對此景物豈可不與他判斷遣高力士取羯鼓上臨軒縱擊一曲名春光好回顧柳杏皆拆上指笑謂嬪嬙曰此事不喚我作天公可乎唐裴行儉平都支遮旬獲馬腦盤廣二尺寸美詩內府殷紅馬腦盤春秋大雨雹

和頓教授見寄用除夜韻

我笑陶淵明種秫二頃半婦言既不用還有責子歎無

絃則無琴何必勞撫玩我笑劉伯倫醉髮蓬萊散二豪

苦不納獨以錘自伴既死何用埋此身同夜旦孰云二

子賢自結兩重案笑人還自笑出口談治亂一生溷塵

垢晚以道自盟無成空得懶坐此百事緩仄聞頓夫子
講道出新貫豈無一尺書恐不記庸懦怒亂陋邦貧且病
數米銖稱炭慙愧章先生十日坐空館袖中出子詩貪
讀酒屢煖狂言各須慎勿使輸新粢

淵明責子詩雖有五男兒總不好紙筆種秫無益注並見前晉劉伶傳字伯倫嘗乘鹿車攜一壺酒使人荷鍤隨之謂曰死便埋我著酒德頌曰俯觀萬物擾擾焉若江海之載浮萍二豪侍側焉如蜾蠃之與螟蛉莊子大宗師死生命也其有夜旦之常天也傳燈錄據款結案又兩重公案皆禪宗語如此類甚多宗門公案有一千七百說文牆書版也長一尺為率莊子庚桑楚簡髮而櫛數米而炊稱炭用韋莊事詳四卷次韻柳子玉詩注晉孫盛傳嘗謁殷浩談論食冷而復煖者數四漢刑法志罪人獄已決定為城旦春滿三歲為鬼薪白粢惠帝紀註曰取薪給宗廟為鬼薪坐釋米使正白為白粢皆二歲刑也

和子由四首

韓太祝送游太山

偶作郊原十日游未應回首厭籠囚但教塵土驅馳足
終把雲山爛漫酬聞道逢春思濯錦便須到處覓菟裘
恨君不上東封頂夜看金輪出九幽

蜀記錦城南有濯錦江左傳隱十一年公曰使營菟裘吾將老焉菟兔都反史記封禪書武帝封禪上太山乃令人上石立之太山巔太山記東南峯名曰觀鶴一鳴見日出劉禹錫詩赤波千萬里湧出黃金輪黃庭經九幽日月洞空無

送春

夢裏青春可得追欲將詩句絆餘暉酒闌病客惟思睡
蜜熟黃蜂亦懶飛芍藥櫻桃俱掃地公自注病過此二物鬢絲禪榻
兩忘機憑君借取法界觀一洗人閒萬事非公自注來書云近看此書

余未嘗見也

百樂天禽蟲十二章蠶老蠶成不庇身蜂饑蜜熟屬他人鬢絲禪榻注再見華嚴經法界觀清涼澄觀禪師述以明華嚴大意杜子美送韓十四詩歎息人間萬事非

首夏官舍卽事

安石榴花開最遲絳裙深樹出幽菲吾廬想見無限好
客子倦游胡不歸坐上一樽雖得滿古來四事巧相違
令人卻憶湖邊寺垂柳陰陰晝掩扉

張華博物志張騫使西域還得安石榴實子野酒譜扶風傳云頓遜國有安石榴取汁數日成美酒百樂天山石榴詩題詩報我何所云苦云色似石榴裙鄭谷子規詩春山無限好猶道不如歸詩國風式微式微胡不歸後漢孔融傳常歎曰坐上客常滿樽中酒不空吾無憂矣四事用謝靈運擬鄴中詩序注已見

送李供備席上和李詩

家聲赫奕蓋并涼也解微吟錦瑟旁
擘水取魚湖起浪引杯看劍坐生光
風流別後人人憶才器歸來種種長

不用更貪窮事業風騷分付與沈湘

漢中山靖王傳雍門子壹微吟古詩話李商隱有錦瑟詩云是令狐楚之青衣杜子美詩暫醉佳人錦瑟旁韓退之詩擊水看蛟螭杜冥左氏莊詩檢書燒燭短看劍引杯長

西齋

西齋深且明中有六尺牀
病夫朝睡足危坐覺日長昏
昏既非醉踽踽亦非狂
褰衣竹風下穆然中微涼起行
西園中草木含幽香
榴花開一枝桑棗沃以光
鳴鳩得美蔭困立志飛翔
黃鳥亦自喜新音變圓吭
杖藜觀物化亦以觀我生
師莊切萬物各得時我生日皇皇

晉賀循傳晉武賜循以六尺牀自樂天詩好是幽眠處松陰六尺牀又詩日高眠足猶慵起危坐見管子弟子職篇詩國風獨行踽踽詩大雅吉甫作頌穆如清風

宋玉九辯薄寒之中人詩國風桑之未落其葉沃若莊子山木篇觀一蟬方得美
蔭而忘其身左太冲蜀都賦鴻鸞鶴侶振露鶉胡雪飛水宿弄吭清渠莊子讓王
篇原憲杖藜而應門齊物論周與胡蝶則必有分矣此之謂物化淮南子春女悲
秋士哀而知物化周易觀我生進退未失道也劉禹錫賦觀物之餘遂觀我生陶
潛歸去來善萬物之得時又寓形宇內復幾時曷
不委心任去留胡爲皇皇欲何之揚子仲尼皇皇

小兒

小兒不識愁起坐牽我衣我欲嗔小兒老妻勸兒癡兒
癡君更甚不樂愁何爲還坐愧此言洗盞當我前大勝

劉伶婦區區爲酒錢

晉劉伶傳伶求酒於妻
妻捐酒毀器涕泣諫之

寄劉孝叔

劉孝叔名述神宗時擢侍御史知雜數論事劄切會與
王安石爭獄事不合出知江州踰歲提舉崇禧觀東坡
倅杭與孝叔會虎邱和其二詩載第九卷吳興六客堂孝叔其一
人也此詩首言征伐之意熙寧三年十一月詔京畿河北北京東西

路置三十七將將官遂與州郡長吏爭衡故云聯翩三十七將軍
走馬西來各開府又立保甲法令諸州籍保甲聚民而教之禁令
苛急往往去爲盜郡縣不敢以聞故云保甲連村團未徧五年立
方田均稅法詔司農以條約并式頒之天下歲以九月委令佐分
地計量乃書戶帖連莊帳付之以爲地符故云方田訟牒紛如雨
七年呂惠卿建手實法使民自上其家之物產而官爲注籍奉使
者至析秋毫天下病之至八年十月乃罷故曰爾來手實降新書
云云又曰平生學問止流俗是時安石凡議其新政者皆以流俗
謂之也孝叔年七十二卒紹
興間錄其風節贈秘閣修撰

君王有意誅驕鹵椎破銅山鑄銅虎聯翩三十七將軍
走馬西來各開府南山伐木作車軸東海取鼉漫戰鼓
汗流奔走誰敢後恐乏軍興汗資質斧保甲連村團未
遍方田訟牒紛如雨爾來手實降新書抉剔根株窮脉
縷詔書惻怛信深厚吏能淺薄空勞苦平生學問止流

俗衆畏笙竽誰比數忽令獨奏鳳將雛倉卒欲吹那得
譜况復連年苦饑饉剝齧草木啖泥土今年雨雪頗應
時又報蝗蟲生翅股憂來洗盞欲強醉寂寞虛齋臥空
甌公厨十日不生煙更望紅裙踏筵舞故人屢寄山中
信只有當歸無別語方將雀鼠偷太倉未肯衣冠挂神
武吳興丈人真得道平日立朝非小補自從四方冠蓋
鬧歸作二浙湖山主高蹤已白雜漁釣大隱何曾棄簪
組去年相從殊未足問道已許談其粗一作逝將棄官往
卒業俗緣未盡那得覩公家只在雪谿上上有白雲如
白羽應憐進退苦皇皇更把安心教初祖

三國志董卓傳悉椎破銅人鐘漢文帝紀初與郡守爲銅虎符注銅虎符第一
至第五國家當發兵遣使者至郡合符符乃聽受之謝靈運詩金羈相馳逐聯
翩何窮已柳子厚古東門行漢家三十六將軍東方雷動橫陣雲漢趙廣漢傳劫
蘇賢爲騎士屯霸上不請屯所乏軍興藉資資資字當是質字之訛質與質通
史記范雎傳臣之智不足以當樞質而不足以待斧鉞又一語無効請伏斧質
又石慶傳罪當伏斧質又漢書梅福傳雖伏質橫分臣之願也諸本既譌資舊注
因竝作資斧解極無謂今正後漢馬嚴傳註劉徽九章算術曰方田第一晉王羲
之傳交符如雨倒錯違背不復可知漢儒林傳文章爾雅訓辭深厚漢書司馬遷
傳若望侯不相師而用流俗人之言注望怨也流俗謂隨俗人之言而流移其志
又刑餘之人無所比數衆裏笙竽用東郭濫竽事詳一卷將往終南詩注晉樂志
鳳將雛者舊曲也韓退之感春詩艷姬踏筵舞清眸射劍戟孫盛雜語姜維請諸
葛亮與母相失後得母書令求當歸維曰但有遠志不在當歸許嵩建康實錄太
史慈從孫策爲將曹公聞其名遺之書以篋封之發有無所道但貯當歸爾韓退
之詩家請官供不報答無異雀鼠偷太倉挂冠天隱竝已見前注漢楚元王傳遣
子鄧客與申公俱卒業莊子漁父篇孔子請因受而卒學大道俗緣未盡用謝
靈運詩詳七卷汪潭秀才詩注雪谿法詳五卷贈孫莘老安心法詳七卷病中遊
祖塔院王注公烏臺詩案况復連年苦饑饉至更望紅裙踏筵舞供云近來饑荒
飛蝗蔽天以譏朝廷行法事多闕失又言酒食無備公厨蕭索以譏諷朝廷減削
公使錢太甚公事既冗旱蝗又甚貳政巨藩尙如此窘迫耳

孔長源挽詩二首

孔長源名延世官聖裔孫以進士第一嘉祐間知封州有遺愛後知越州改宣州未

至以為管勾三司理欠憑由司出知潤州未行卒長源言若不能出口及見義慷慨老益自強雖離離不以易意工於為文三子皆自教以學文仲武仲平仲皆有傳國史為時名臣詩云不愧蔡邕碑者曾子固志其墓也

少年才氣冠當時晚節孤風益自奇君勝宜為夫子後
林宗不愧蔡邕碑南荒尚記誅元惡東越誰能事細兒
耆舊如今幾人在為君無憾為時悲

韓愈孔幾墓志銘孔世卅八吾見其孫按幾字君嚴弟戡字君勝後漢郭太傳太字林宗舉有道卒四方之士千餘人皆來會葬同志者乃共刻石立碑蔡邕為文既而謂涿郡盧植曰吾為碑銘多矣皆有慙德惟郭有道無愧色耳史記陳軫傳莊易越之鄙細人韓退之詩魯連細兒點

小堰門頭柳繫船吳山堂上月侵筵潮聲半夜千巖響
詩句明朝萬口傳公自注長源自越過杭夜臥有美堂上聯句長源詩云天日遠隨雙鳳落海門遠歷兩潮趨一坐稱善豈

意日斜庚子後忽驚歲在巳辰年佳城一閉無窮事南
望題詩淚灑牋

輿地志吳山本名胥山避伍相故改為吳山杜子美送韋二詩念我能書數字至將詩不必萬人傳漢賈誼傳為長沙傅有服飛入誼舍自傷悼以為壽不得長迺為賦以自廣曰庚子曰斜服集余舍止於坐隅觀甚閑暇後漢鄭元夢孔子告之曰起起今年歲在辰明年歲在巳既悟以讖合之知命當終讖曰歲在龍蛇賢人嗟西京雜記滕公嘗出東都馬忽悲鳴捨地不前公使人掘地得石槲其上書云佳城鬱鬱三千年見白日吁嗟滕公居此室

寄呂穆仲寺丞

孤山寺下水侵門每到先看醉墨痕楚相未亡談笑是
中郎不見典刑存公自注杭有伶人善學呂舉措酷似別後常令作之以為笑君先去踏塵埃
陌我亦來尋桑棗村回首西湖真一夢灰心霜鬢更休

論

史記滑稽傳楚相孫叔敖死優孟爲叔敖衣冠抵掌談笑王大驚以爲叔敖復生也後漢孔融傳素與蔡邕善邕卒後有虎賁士貌類於邕融每酒酣與同坐曰雖無老成人尙有典刑邕爲左中郎將裴度中書郎事詩灰心緣忍事霜鬢爲論兵

余主簿母挽詩

閨庭蘭玉照鄉閭自昔雖貧樂有餘豈獨家人在中饋
卻因麟趾識關雎雲軒忽已歸仙府喬木依然擁舊廬
忍把還鄉千斛淚一時灑向老萊裾

晉謝元傳叔父安嘗曰子弟亦何預人事正欲使其佳元曰譬如芝蘭玉樹欲其生於庭堦耳周易家人在中饋貞吉詩小序麟之趾關雎之應也

送趙寺丞寄陳海州

景疏樓上喚蛾眉君到應先誦此詩若見孟公投轄飲
莫忘衝雪送君時

景疏樓海州卽東海郡爲一疏之鄉故有景疏樓也又見九卷詩注漢陳遵字孟公投轄詳八卷和蘇州太守詩注

答陳述古二首

漫說山東第二州棗林桑泊負春游城西亦有紅千葉
人老簪花卻自羞

小桃破萼未勝春羅綺叢中第一人聞道使君歸去後
舞衫歌扇總生塵公自注陳有小妓述古稱之

樂府徐陵雜曲舞衫回袖勝春風歌扇當腮似秋月劉越石答盧諶詩澄醪覆觴絲竹生塵

張安道樂全堂

列子御風殊不惡猶被莊生譏數數步兵飲酒中散琴
於此得全非至樂樂全居士全於天維摩丈室空翛然

平生痛飲今不飲無琴不獨今無絃我公天與英雄表
龍章鳳姿照魚鳥但令端委坐廟堂北狄西戎談笑了
如今老去苦思歸小字親書寄我詩試問樂全全底事
無全何處更相虧

莊子逍遙游列子御風而行冷然善也旬有五日後反彼於致福者未數數然也晉阮籍傳步兵厨營人善釀有貯酒三百斛乃求為步兵校尉晉魏之際天下多故由是不與世事酣飲為常又嵇康傳與魏宗室婚拜中散大夫常修養性服食之事彈琴詠詩自足於懷與山濤絕交書曰濁酒一杯彈琴一曲志意畢矣庾信詩步兵未飲酒中散未彈琴蕭索無真氣昏昏有俗心莊子至樂篇天下有至樂無有故至樂無樂至譽無譽達生篇得全於酒猶若是而況得全於天乎維摩經長者維摩詰心念文殊師利與大眾俱來即以神力空其室內除去所有惟置一床世說王孝伯曰但使常得無事痛飲酒熟讀離騷便可稱名士晉陶潛蓄素琴一張絃徽不具每朋酒之會則撫而和之曰但識琴中趣何勞絃上聲晉嵇康傳康土木形骸不自藻飾人以爲龍章鳳姿天質自然左傳哀七年吳太伯端委以治吳國語晉侯端委以入註云諸侯祭服也晉謝鯤傳明帝在東宮問鯤論者以君方庾亮自謂何如答曰端委廟堂使百僚準則鯤不如亮一邱一壑自謂過

之杜子美詩談笑無河北又洗兵馬三三豪俊爲時出整頓乾坤濟時了莊子繕性篇樂全之謂得志古之所謂得志者非軒冕之謂也謂無以益其樂而已矣

張文裕挽詞

張文裕名揆舉進士知益都縣中丞范諷薦其材知萊州掖縣民訴早於州州不受文裕自爲奏上之詔除登萊稅役歷官龍圖直學士戶部侍郎致仕卒年八十八文裕齊州歷城人故有濟南名士句益都在劍外而文裕有惠政故有劍外生詞句

高才本出朝廷右能事空推德業餘每見便聞曹植句
至今傳寶魏華書濟南名士新凋喪劍外生祠已潔除
欲寄西風兩行淚依然喬木鄭公廬

漢田叔傳上召與語漢廷臣無能出其右者周易天下之能事畢矣易繫辭可久則賢人之德可大則賢人之業三國魏陳思王植字子建善屬文杜子美詩文章曹植波瀾闊王注魏華河南人善書其字如褚河南而用筆開闢有豆盧公神道碑見於世又華爲王徽之外孫善草隸書杜子美宴歷下亭詩海內此亭古濟南名士多又寄杜位詩封書兩行淚霑泗裊新詩自樂天寄劉蘇州詩何堪老淚交流日正是西風搖落時後漢鄭元傳孔融深敬於元告高密縣爲元特立一鄉曰

鄭君好學貫懷明德今鄭君鄉宜曰鄭
公鄉廣開門衛令容高車號為通德門

懷西湖寄鼂美叔同年

鼂美叔名端彥時提點
兩浙刑獄置司杭州

西湖天下景游者無愚賢淺深隨所得誰能識其全嗟
我本狂直早為世所捐獨專山水樂付與寧非天三百
六十寺幽尋遂窮年所至得其妙心知口難傳至今清
夜夢耳目餘芳鮮君持使者節風采爍雲煙清流與碧
巘安肯為君妍胡不屏騎從暫借僧榻眠讀我壁間詩
清涼洗煩煎策杖無道路直造意所便應逢古漁父葦
閒自延緣問道若有得買魚勿論錢

歐陽公錄陽關詩至今清夜夢猶逐北潭北漢霍光傳天下想聞其風采莊子
漁父詳見七卷九日湖上尋周李詩注杜子美詩白魚如切玉朱橘不論錢

和梅戶曹會獵錢溝

山西從古說三明誰信儒冠也捍城竿上鯨鯢猶未掩

公自注近
梟數盜

草中狐兔不須驚東州趙叟一作飲無敵南國梅

仙詩有聲不向如臯閑射雉歸來何以得卿卿

公自注是日
惟梅趙不射

後漢段熲傳贊山西多猛三明麗蹤詳見九卷二公再和詩注左傳宣十二年古
者明王伐不敬取其鯨鯢而封之以為大戮於是乎有京觀杜子美冬狩行草中
狐兔盡何益天子不在咸陽宮左傳宣十二年趙使在後漢梅福傳隱吳市門卒
至今人以為仙左傳昭二十八年賈大夫惡娶妻而美三年不言不笑御以如臯
射雉獲之其妻始笑
而言卿卿注見四卷

祭常山回小獵

青蓋前頭點皂旗黃茅岡下出長圍弄風驕馬跑空立
趁兔蒼鷹掠地飛回望白雲生翠巘歸來紅葉滿征衣

聖明若用西涼簿白羽猶能效一揮

南史侯景作長圍圍梁宋書魏主就臧質求酒封溲便與之魏主怒築長圍一夕而合晉張重華傳重華據西涼用主簿謝艾為將軍進軍臨河麻秋以三萬眾距之艾乘輅車冠白帽鳴鼓而行秋望而怒曰艾年少書生冠服如此輕我也命黑稍籠驥三千人馳擊之左右大擾艾乃下車踞胡牀指麾處分賊以為伏兵發懼不敢進艾乘勝奔擊大敗之晉顧榮傳陳敏之亂假榮丹陽內史榮與周玘等潛謀起兵攻敏榮發橋斂舟於南岸敏率萬餘人出不獲濟榮麾以白羽扇其眾潰散

和章七出守湖州二首

章字子厚

方丈仙人出渺茫高情猶愛水雲鄉功名誰使連三捷
身世何緣得兩忘早歲歸休心共在他年相見話偏長
只應未報君恩重清夢時時到玉堂

史記封禪書蓬萊方丈瀛洲此三神山者相傳在渤海中詩小雅一月三捷百樂天詩性與時相遠身將世兩忘陶淵明斜川詩吾生行歸休漢揚雄傳歷金門上玉堂有日矣李宗諤翰苑雜記太宗皇帝御書飛白玉堂之署四字淳化三年賜今在本院玉堂門上

絳闕雲臺總有名應須極貴又長生鼎中龍虎黃金賤

松下龜蛇綠骨輕公自注君好爐火而餌茯苓雪水未渾纓可濯弁峯初

見眼應明兩卮春酒真堪羨獨占人間分外榮

晉傳元西都賦魏魏絳闕續仙傳謝自然入海至一山遇道士曰天台司馬承禎身居赤城名在絳闕真良師也後漢朱景等傳贊顯宗追感前世功臣圖畫二十八將於南宮雲臺王注金丹之術有日鬼月鬼白虎青龍真鉛正汞蓋五行強名耳雪水弁峯注並見五卷詩國風為此春酒以介眉壽時子厚二親無恙故云

和張子野見寄三絕句

過舊游

前生我已到杭州到處長如到舊游更欲洞霄為隱吏
一菴閑地且相留

公於錢塘主簿陳師仲書云一歲率常四五夢至西湖上此殆世俗所謂前緣者在杭州嘗游壽聖院入門便悟會到能言其院後堂殿山石處故詩中有前生已

到之語杭州圖經洞霄宮在餘杭縣西南十八里唐大歷五年建爲天柱觀祥符元年改今額杜子美詩隱吏逢梅福

見題壁

狂吟跌宕無風雅醉墨淋漓不整齊應爲詩人一回顧
山僧未忍掃黃泥

小說有富家子杜四郎常戲爲詩章號杜荀鵬以比荀鶴每有詩卽題屋壁親賓或汗漫之卽云三十年來塵撲面如今始得一枚泥

竹閣見憶

栢堂南畔竹如雲此閣何人是主人但遣先生披鶴氅
不須更畫樂天真

世說孟昶家在京口嘗見王恭乘高輿披鶴氅裘於時微雪昶於籬間窺之歎曰此真神仙中人竹閣有樂天祠堂

和蔣夔寄茶

我生百事常隨緣四方水陸無不便扁舟渡江適吳越
三年飲食窮芳鮮金盞玉膾飯炊雪海螯江柱初脫泉
臨風飽食甘寢罷一甌花乳浮輕圓自從捨舟入東武
沃野便到桑麻川翦毛胡羊大如馬誰記鹿角腥槃筵
廚中烝粟埋飯糲大杓更取酸生涎柘羅銅碾棄不用
脂麻白土須盆研故人猶作舊眼看謂我好尙如當年
沙谿北苑强分別水腳一線爭誰先清詩兩幅寄千里
紫金百餅費萬錢吟哦烹噉兩奇絕只恐偷乞煩封纏
老妻稚子不知愛一半已入薑鹽煎人生所遇無不可
南北嗜好知誰賢死生禍福久不擇更論甘苦爭蚩妍

知君窮旅不自釋因詩寄謝聊相鑄

大業拾遺吳郡獻松江鱸魚膾須八九月霜下之時鱸魚白如雪取三尺以下者作之以香菜花葉相間和以細縷金橙食之所謂金齏玉鱸東南之佳味也王注海螯言蟹江柱江瑤柱也韓退之簞詩倒身甘寢百疾愈劉禹錫茶詩欲知花乳清冷味須是眠雲跋石人漢地理志琅邪郡東武縣世說諸阮飲酒不復用常杯斟酌以大甕盛酒圍坐相向大約更飲之謂茶錄北苑里名官焙曰龍焙蓋造御茶也呂仲吉茶記壺源其別有八沙谿其一也蔡君謨茶錄建安人鬪試以水痕先者為負故較勝負之說曰相去一水兩水王注蜀人以芝蔴白土煎茶又隨置煎茶亦蜀中風味唐薛能茶詩隨壺添長戒舊宜煮更誇

答李邦直

李邦直名清臣蚤以詞藻受知人主然志於利祿操持悖繆與鄧溫伯章惇諸人銳意紹述正人竄逐幾無噍類後追治其罪貶雷州司戶公守高密時邦直以京東提刑行部至密也東坡七年瘴海僅得生還推原禍本實自邦直發之云

美人如春風著物物未知羈愁似冰雪見子先流澌子從徐方來吏民舉熙熙扶病出見之驚我一何衰知我久慵倦起我以新詩詩詞如醇酒盎然熏四支徑飲不

覺醉欲和先昏疲西齋有蠻帳風雨夜紛披放懷語不擇撫掌笑脫頤別來今幾何春物已含姿柳色日夜暗子來竟何時徐方雖云樂東山禁游嬉又無狂太守何以解憂思聞子有賢婦華堂詠冬斯盍不倒囊橐賣劍買蛾眉不用教絲竹唱我新歌詞

楚詞望美人兮未來東方朔七諫赴湘沅之流澌兮韻書澌流水也老子眾人熙熙如享太牢如登春臺漢匡衡傳諸儒語曰匡說詩解人頤注使人笑而不能止也詩小序冬斯后妃子孫衆多也按邦直再娶孫巨源女賢婦謂孫也劉禹錫楊柳枝詞請君莫奏前朝曲唱我新翻楊柳枝

古香齋鑒賞袖珍施註蘇詩卷之十

古香齋鑒賞袖珍施註蘇詩卷之十一

長洲顧嗣立

商邱宋 榮

閱定 毗陵邵長蘅 刪補

滏陽張榕端

商邱宋 至

詩六十六首

起守高密至得代歸京師卷中有除夜大雪留維州元旦晴遂行之作按公年譜除夜當是熙寧丙辰元旦

則丁巳元日也

和文與可洋川園池三十首

唐地理志洋州洋川郡武德元年析梁州之西鄉黃金興置

湖橋

朱闌畫柱照湖明白葛烏紗曳履行橋下龜魚晚無數
識君拄杖過橋聲

橫湖

貪看翠蓋擁紅粧不覺湖邊一夜霜卷卻天機雲錦段
從教匹練寫秋光

古詩娥娥紅粉粧纖纖山素手宋玉高唐賦蜺為旌翠為蓋木元虛海賦雲錦散
文於沙洲之際韓退之曲江荷花詩撐舟昆明度雲錦脚敲兩舫叫吳歌謝元暉
詩澄江淨如練

書軒

雨昏石硯寒雲色風動牙籤亂葉聲庭下已生書帶草
使君疑是鄭康成

韓退之詩鄭侯家多書插架三萬軸一一懸牙籤新若手未觸三齊記畧
鄭康成居不其城南山中教授山下草如薤葉長尺餘人號康成書帶草

冰池

不嫌冰雪遶池看誰似詩人巧耐寒記取羲之洗硯處
碧琉璃下黑蛟蟠

杜子美詩勝裏金花巧耐寒晉書王羲之傳嘗與人書云張芝臨池學書
池水盡黑使人耽之若是未必後之也洗硯承天歸宗寺有右軍墨池

竹塢

晚節先生道轉孤歲寒唯竹相娛麤才杜牧真堪笑
喚作軍中十萬夫

白樂天蒼賈舍人詩一別承明三領郡從教人道是麤材北夢瑣言唐自大中以
來以兵為戲廊廟之上恥言韜畧就有如盧潘薛能者目為麤材杜牧之賦竹林
外裏兮十萬丈夫已見三卷次韻子由詩注

荻浦

雨折霜乾不耐秋白花黃葉使人愁月明小艇湖邊宿

便是江南鸚鵡洲

九域志鄂州古迹有鸚鵡洲庾信詩春洲鸚鵡色流水桃花香李太白詩鸚鵡洲橫漢陽渡

蓼嶼

秋歸南浦蟪蛄鳴霜落橫湖沙水清臥雨幽花無限思
抱叢寒蝶不勝情

家語孔子謂宰我曰遠山十里蟪蛄之聲猶在於耳江文通別賦送君南浦傷如之何

望雲樓

陰晴朝暮幾回新已向虛空付此身出本無心歸亦好
白雲還似望雲人

華嚴經處世界如虛空如蓮花不著水陶淵明歸去來辭雲無心而出岫

天漢臺

漾水東流舊見經銀潢左界上通靈此臺試向天文覓
閣道中間第幾星

尚書蟠冢導漾東流為漢謝希逸月賦斜漢左界北陸南
運漢天文志天一紫宮後十七星絕漢抵營室曰閣道

待月臺

月與高人本有期挂簷低戶映蛾眉只從昨夜十分滿
漸覺冰輪出海遲

二樂榭

此閒真趣豈容談二樂并君已是三仁智更煩訶妄見
坐令魯叟作瞿曇

公自注來詩云
二見因妄生

灤泉亭

聞道池亭勝兩川應須爛醉蒼雲煙勸君多揀長腰米
消破亭中萬斛泉

杜子美詩爛醉是生涯李賀憶昌谷
山居詩長鎗江米熟小樹棗花香

吏隱亭

吏隱出汝南先
賢傳鄭欽事

縱橫憂患滿人閒頗怪先生日日閑昨夜清風眠北牖
朝來爽氣在西山

霜筠亭

解籜新篁不自持嬋娟已有歲寒姿要看凜凜霜前意
須待秋風粉落時

無言亭

殷勤稽首維摩詰敢問如何是法門彈指未終千偈了
向人還道本無言

露香亭

亭下佳人錦繡衣滿身瓔珞綴明璣晚香消歇無尋處
花已飄零露已晞

西域記西域國人首冠花縵身衣
瓔珞詩小雅湛湛露斯匪陽不晞

涵虛亭

水軒花榭兩爭妍秋月春風各自偏惟有此亭無一物
坐觀萬景得天全

谿光亭

决去湖波尙有情，卻隨初日動簷楹。谿光自古無人畫，憑仗新詩與寫成。

古詩話詩人以畫爲無聲詩，詩爲有聲畫。

過谿亭

身輕步穩去忘歸，四柱亭前野約微。忽悟過谿還一笑，水禽驚落翠毛衣。

爾雅：覆舟，獨木橋也。廬山記：遠公與陶元亮陸修靜談道，不覺過虎溪，因相與大笑，故世傳三笑圖。

披錦亭

煙紅露綠曉風香，燕舞鶯啼春日長。誰道使君貧且老，

繡屏錦帳咽笙簧。

禊亭

曲池流水細鱗鱗，高會傳觴似洛濱。紅粉翠娥應不要，畫船來往勝於人。

何遜下方山詩：鱗鱗水逆去，瀾瀾急還舟。晉東晉傳：武帝問三日曲水之義，荀曰：昔周公城洛邑，因流水以泛酒，故逸詩云：羽觴隨波。又秦昭王以三日置酒河曲，見金人奉水心之劍，曰：令君制有西夏之勳。諸侯因此立爲曲水，二漢相承皆爲盛集。

菡萏亭

日日移牀趁下風，清香不盡思何窮。若爲化作龜千歲，巢向田田亂葉中。

史記：龜負荻，傳有神龜在江南嘉林中，常巢於芳蓮之上。抱朴子：千歲龜巢於蓮葉，或在叢菁之下。樂府江南曲：江南可採蓮，蓮葉何田田。

茶蘼洞

長憶故山寒食夜野茶蘼發暗香來分無素手簪羅髻

且折霜蕤浸玉醅長憶故山一作半兩半晴

篔簹谷異物志篔簹生水邊長數尺圍一尺五六寸一節相去六七寸廬陵界有之始興以南尤多

漢川修竹賤如蓬斤斧何曾赦籜龍料得清貧饒太守

渭川千畝在曾中公有文與可畫篔簹谷偃竹記云與可與其妻游谷中燒笋晚食發函得此詩笑噴飯滿案

盧仝寄舅詩竹林吾最惜新筍好青守萬籜抱龍兒攢迸溢林數吾眼恨不見心腸痛如搗籜龍正稱寬莫殺入汝口丁寧囑付汝汝活籜龍否史記貨殖傳渭川千畝竹其人與千戶侯等

寒蘆港

溶溶晴港漾春暉蘆葦生時柳絮飛還有江南風物否

桃花流水鱖魚肥

張志和漁父詞西塞山頭白鳥飛桃花流水鱖魚肥永衡記黃河二月三月水名桃花水韻注鱖乃魚也

野人廬

少年辛苦事犁鋤剛厭青山遶故居老覺華堂無意味
卻須時到野人廬

此君菴

寄語菴前抱節君與君到處合相親寫真雖是文夫子
我亦真堂作記人

杜子美丹青引必逢佳士亦寫真注名竹為抱節君先生新語也與可畫竹名之曰墨君有堂焉先生作墨君堂記

香橙徑

金橙縱復里人知不見鱸魚價自低須是松江煙雨裏
小船燒葦擣香齏

王注鱸魚所以爲鱸金橙所以爲葦松江之鱸江南所稱也此爲金齏玉鱸又詳卷十和蔣夔寄茶詩注

南園

不種天桃與綠楊使君應欲候農桑春畦作雨過羅紈
膩夏隴風來餅餌香

北園

漢水巴山樂有餘一麾從此首歸塗北園草木憑君問
許我他年作主無

顏延年五君詠屢薦不入官一麾乃出守杜牧之將赴吳興詩擬把一麾江海去

寄題刁景純藏春塢

白首歸來種萬松待看千尺舞霜風年拋造物陶甄外
春在先生杖履中楊柳長齊低戶暗櫻桃爛熟滴堦紅
何時卻與徐元直共訪襄陽龐德公

景純藏春塢前有岡皆種松公有詩云爲君栽插萬松岡白樂天夢游春詩門柳暗全低簷櫻紅半熟襄陽記龐德公居峴山之南未嘗入城府諸葛孔明每至德公家獨拜牀下德公初不令止司馬德操嘗詣德公值其上冢德操徑入其室呼德公妻子使速作黍徐元直向云當來就我與德公談其妻子皆羅拜堂下奔走共設須臾德公還直入相就不知何者是客也

玉盤盂二首

并序

東武舊俗每歲四月大會于南禪資福兩寺以芍
藥供佛而今歲最盛凡七千餘朵皆重跗累萼繁

麗豐視中有白花正圓如覆盃其下十餘葉稍大
承之如槃姿格絕異獨出於七千朶之上云得之
於城北蘇氏園中周宰相言公之別業也而其名
俚甚乃爲易之

雜花狼籍占春餘芍藥開時掃地無兩寺粧成寶瓔珞
一枝爭看玉盤盃佳名會作新翻曲絕品難尋舊畫圖
從此定知年穀熟姑山親見雪肌膚

莊子逍遙游藐姑射之山神人居焉肌膚若冰
雪綽約若處子其神凝使物不疵癘而年穀熟

花不能言意可知令君痛飲更無疑但持白酒勸嘉客
直待瓊舟覆玉鬘負郭相君初擇地看羊屬國首吟詩

吾家豈與花相厚更問殘芳有幾枝

周禮六藝皆有舟六藝謂鷁鷁鳥鷁鷁黃鷁虎鷁雖鷁
注舟所以薦鷁如今之承盤也負郭看羊俱用蘇氏事

和潞公超然臺

我公厭富貴常苦勦業尋相期赤松子永望白雲岑清
風出談笑萬竅爲號吟吟成超然詩洗我蓬之心嗟我
本何人麋鹿強冠襟身微空志大交淺屢言深囑公如
得謝呼我幸寄音但恐酒錢盡煩公揮橐金

漢張良傳注赤松子仙人號神農時爲雨師事見劉向列仙傳詩大雅穆如清風
再見莊子齊物論作則萬竅怒號逍遙游夫子猶有蓬之心也夫張景陽詠史揮
金樂當年歲暮不留儲杜子美戲簡鄭廣文賴有蘇司業時
時與酒錢漢書陸賈傳田所使越橐中裝賣千金分其子

聞喬太博換左藏知欽州以詩招飲

今年果起故將軍幽夢清詩信有神馬革裹屍真細事
虎頭食肉更何人陣雲冷壓黃茅瘴羽扇斜揮白葛巾
痛飲從今有幾日西軒月色夜來新

公先有鐵溝行贈喬云今年定起故將軍故此云果且曰信有神也莊子美詩醉裏從爲客詩成覺有神後漢馬援傳男兒要當死於邊野以馬革裹屍還葬耳何能臥牀上在兒女子手中邪班超傳相者曰生燕領虎頭飛而食肉此萬里侯相也史記天官書陳雲如立垣再見通眞子瘡論嶺南從仲春訖仲夏行青草瘴季夏訖孟冬行黃茅瘴諸葛亮與司馬宣王對於渭濱王戎服蒞事使人視亮乘素巾葛巾羽扇指揮三軍

喬將行烹鵝鹿出刀劍以飲客以詩戲之

破匣哀鳴出素虯倦看鷓鴣聽啾啾明朝只恐兼烹鶴
此去還須卻佩牛便可先呼報恩子不妨仍帶醉鄉侯
他年萬騎歸應好奈有移文在故邱

雲谿友議韋鵬翼題肝昭明府壁云自從煮鶴燒琴後背卻青山臥明月佩牛用漢龔遂事注見前韓退之送石處士詩忽騎將軍馬自號報恩子唐王績撰醉鄉記以配劉伶酒德頌皮日休詩他年謁帝言何事請贈劉伶作醉侯孔稚珪北山移文引云周彦倫先隱北山後出爲海鹽令欲還山稚珪乃假山靈之意作文移之

次韻劉貢父李公擇見寄二首

白髮相望兩故人眼看時事幾番新曲無和者應思郢
論少卑之且借秦歲惡詩人無好語公自注公擇來詩皆道吳中饑苦之事夜長

鰥守向誰親公自注責父近喪少思多睡無如我鼻息雷鳴撼四鄰

宋玉對楚王問客有歌於郢中者云云其曲彌高其和彌寡漢張釋之傳釋之言便宜事文帝曰卑之母甚高論令今可行於是言秦漢閒事漢賈山傳言治亂之道借秦爲喻名曰至言李賀詩沙路歸來聞好語早火不光天下雨

何人勸我此閒來絃管生衣甑有埃綠蟻濡脣無百斛
蝗蟲撲面已三回磨刀入谷追窮寇灑涕循城拾棄孩

爲郡鮮歡君莫歎猶勝塵土走章臺

魏埃用後漢范丹甌中生塵事已見七卷注謝元暉詩嘉魴聊可薦綠蟻方獨持
史記秦始皇紀後贊餐未及下咽酒未及濡唇漢張敞傳敞守京兆尹稱職然無
威儀時罷會過走馬章臺街公烏臺詩話時朝廷新法減削公使錢及造酒不得
百石致管絃生衣甌釜生埃及言蝗蟲災傷盜賊四起旱澇饑饉以見政事闕失
皆新法不
便之故

寄黎眉州

黎眉州名錞字希聲蜀人志林云希聲治春秋有家法
然爲人質木遲緩劉貢父戲爲黎椽子黎以爲指其德
不知樣子直是木也一日聯騎出市人有鬻之者大笑幾落馬今
吾謫海南所居有此木霜實纍然二君皆入鬼錄坐念故友之風
味豈可復得劉固不異於
世黎亦能文字不苟隨者

膠西高處望西川應在孤雲落照邊瓦屋寒堆春後雪
峨眉翠掃雨餘天治經方笑春秋學好士今無六一賢

公自注君以春秋受知歐陽
文忠公公自號六一居士

且待淵明賦歸去共將詩酒趁流年

離退之寄盧仝詩春秋三傳東高閣獨抱遺經究終始按王介甫素不喜春秋目
爲黝爛朝報時介甫方得志故云治經方笑春秋學公爲眉人黎方守眉故有淵
明歸去
之句

和趙郎中捕蝗見寄

趙郎中成伯時以
尚書郎倅密州

麥穗人許長穀苗牛可沒天公獨何意忍使蝗蟲發驅
攘著令典農事安可忽我僕旣胼胝我馬亦款矻飛騰
漸云少筋力亦已竭苟無百篇詩何以醒睡兀初如疏
畎澮漸若決澥渤往來供十吏腕脫不容歇平生輕妄
庸熟視笑魏勃愛君有逸氣詩壇專斬伐民病何時休
吏職不可越慎無及世事向空書咄咄

韓退之稻畦詩魚肥知已秀鶴沒覺初深尚書肅畎澮距川漢遊俠傳陳遵爲河
南太守至官名書吏十八治私書謝京師故人遵馮几口占書數百封唐王劇傳

爲鳳閣舍人壽春等五王出閣有司具儀忘載冊文羣臣已在方悟其闕勅召五吏執筆分占其辭然唐蘇頌傳爲中書舍人時書詔填委口所占授輕重無所差書吏白曰可公徐之不然手腕脫矣漢高五王傳灌嬰聞魏勃本教齊王反使使召責問勃勃退立股戰而栗恐不能言者灌將軍熟視笑曰人謂魏勃勇妄庸人耳漢宣帝紀吏或越職踰法以取名譽晉殷浩傳雖被放黜口無怨言但終日書空作咄咄怪事四字

登常山絕頂廣麗亭

西望穆陵關東望琅邪臺南望九仙山北望空飛埃相將叫虞舜遂欲歸蓬萊嗟我二三子狂飲亦荒哉紅裙欲仙去長笛有餘哀清歌入雲霄妙舞纖腰回自從有此山白石封蒼苔何嘗有此樂將去復徘徊人生如朝露白髮日夜催弃置當何言萬劫終飛灰

史記齊世家昔名康公命我先君曰東至海西至河南至穆陵北至無棣王注穆陵山在沂水縣鄒縣山在沂水胸山諸城三縣界始皇嘗登山樂之作琅琊臺地

在今諸城東南又九仙山在錢塘臨安或云在密州諸城縣杜子美慈恩塔詩回首叫虞舜蒼梧雲正愁盧仝詩蓬萊山在何處玉川子乘此清風欲歸去趙飛燕外傳帝嘗與后坐瀛洲樹后歌歸風送遠之曲帝以文犀筋擊玉甌令后所愛侍郎馬無方吹笙以倚后歌中流歌酣風大起后揚袖曰仙乎仙乎去故而就新順風揚音無方長翁細柳與相屬帝曰無方爲我持后遺捨筌持后履久之風霽后泣曰帝恩我使我仙去不得悵然泣數行下他日宮姝或裝翳爲縹號留仙翳又飛燕舞腰宛轉若流風之回雪晉羊祜傳登峴山鎮謂鄒湛等曰自有宇宙便有此山山來賢達勝士登此遠望如我與卿者多矣然埤溼無聞使人悲傷如百歲後有知魂魄猶應登此山也荆

薄薄酒二首

并序

膠西先生趙明叔家貧好飲不擇酒而醉常云薄薄酒勝茶湯醜醜婦勝空房其言雖俚而近乎達故推而廣之以補東州之樂府既又以爲未也復自和一篇聊以發覽者之一噓云耳

薄薄酒勝茶湯麤麤布勝無裳醜妻惡妾勝空房五更
待漏鞞滿霜不如三伏日高睡足北牕涼珠襦玉柙萬
人相送歸北邙不如懸鶉百結獨坐負朝陽生前富貴
死後文章百年瞬息萬世忙夷齊盜蹠俱亡羊不如眼
前一醉是非憂樂兩都忘

西京雜記漢制諸陵皆珠襦玉匣形如鎧甲以金縷之張景陽七哀詩北邙何累
纍高陵有四五借問誰家墳皆云漢世上王注子夏衣若懸鶉董京衣百結宋國
有田夫嘗衣縑縻自曝於日顧其妻曰負日之暄人莫知將獻之於吾君莊子駢
拇篇滅與穀二人牧羊而俱亡其羊問滅則挾策讀書問穀則博塞以遊二人事
業不同其於亡羊均也伯夷死名於首陽之下盜跖死
利於東陵之上二人所死不同其於殘生傷性均也

薄薄酒飲兩鍾麤麤布著兩重美惡雖異醉暖同醜妻
惡妾壽乃公隱居求志義之從本不計較東華塵土北

應風百年雖長要有終富死未必輸生窮但恐珠玉留
君容千載不朽遭樊崇文章自足欺盲聾誰使一朝富
貴面發紅達人自達酒何功世間是非憂樂本來空

應璩古樂府道相逢三叟何以早壽中與前致詞室內妻妾醜漢高祖紀幾敗
乃公事東華塵前董戲語有海風月不如東華軟紅香土北牕風見前註漢王
莽傳赤白樊崇等入關以安宮室為墟宗廟園陵皆發掘唯霸陵杜陵文帝
霸陵宣帝杜陵後漢一益子傳赤白發掘諸陵凡有玉柙斂者率皆如生故遂多
行淫穢吉樂府不日牛羊上邱隴當
時近前而發紅白樂天嘗作酒功贊

同年王中甫挽詞

王中甫名介三衢人中嘉祐六年直言極
諫科東坡入三等中甫四等為秘書丞知

靜海縣除秘閣校勘既寧初介甫被召不復辭中甫寄詩曰草廬
三顧動幽蕙薰帳一空生曉寒蓋有所諷介甫後賦詩云丈夫出
處非無意猿鶴從來自不知為中甫發也介甫既得政神宗轉對
羣臣中甫進疏云願陛下師心勿師人帝納之以喻介甫且以奏
疏示之介甫不樂深闕其言會考開封試與劉貢父言語往
復御史劾之罷判鼓院歸館知湖州去郡卒官止祠部郎中

先帝親收十五人

公注仁宗朝賢良十五人今惟富鄭公張宣徽錢純老及余與舍弟在耳

四方爭看

擊鵬鷗如君事業真堪用顧我衰遲不足論出處陞沈十年後死生契闊幾人存他時京口尋遺迹宿草猶應有淚痕

詩國風死生契闊與子成說莊子美詩他時一笑後今日幾人存

七月五日二首

法谷所載尋醫為去官入務乃任理詩中所用蓋出此

避謗詩尋醫畏病酒入務蕭條北牕下長日誰與度今年苦炎熱草木困薰煮况我早衰人幽居氣如縷秋來有佳興秫稻已含露還復此微吟往和糟牀注

唐陸贄傳避謗不著書晉顧榮傳謂張翰曰惟酒可以忘憂但無如作病何王注詩尋醫謂不作詩也酒入務謂止酒不飲也莊子美詩流汗臥江亭更深氣如縷

又羌村詩預知秫黍收已覺糟牀注

何處覓新秋蕭然北臺上秋來未云幾風日已清亮雲閒聳孤翠林表浮遠漲新棗漸堪剝晚瓜猶可餉西風送落日萬竅含悽愴念當急行樂白髮不汝放

詩國風八月剝棗萬竅注三見漢揚雄傳人生行樂耳須富貴何時杜子美詩苦遭白髮不相放

趙郎中見和戲復答之

趙子吟詩如潑水一揮三百八十字奈何效我欲尋醫恰似西施藏白地趙子飲酒如淋灰一年十萬八千盃若不令君早入務飲竭東海生黃埃我衰臨政多繆錯羨君精采如秋鶚頗哀老子今日飲為君坐嘯主畫諾

韓退之寄崔立之詩文如翻水成初不用意為白樂天簡簡吟于三行坐事調品不有迷頭白地藏季太白襄陽歌云百年三萬六千日一日須傾三百盃若以歲計則當十萬八千杯矣神仙傳麻姑云海中行復揚塵龜照燕城賦直視千里外唯見起黃埃北夢瑣言符載為劉闢直督云靈螭出水秋鸚乘風後漢馬援傳接為隴西太守任吏以職但總大體而已諸曹吏自外事輒曰此承掾之任何足相煩頗哀老子使得遨遊若大姓侵小民黠羌欲拒旅此太守事耳前漢袁盎傳能日飲亡何詳四卷和劉道原詠史詩注後漢黨錮傳汝南太守竇資任功曹范滂南陽太守成瑨亦委功曹岑晡二郡為謠曰汝南太守范滂南陽竇資主畫諾南陽太守岑公孝引農成瑨但坐嘯

次韻周邠寄鴈蕩山圖二首

周邠字開祖錢塘人東坡倅杭三年與開祖數從湖

山之游見於酬唱故云西湖三載與君同是時開祖為樂清令鴈蕩出是在境內

指點先憑採藥翁丹青化出大槐宮眼明小閣浮煙翠齒冷新詩嚼雪風二華行觀雄陝右九仙今已壓京東公自注將赴河中密邇太華九仙在東武奇秀不減鴈蕩也此生的有尋山分已覺溫台落手

中

山志鴈蕩山在溫州樂清縣天下奇秀然自古圖牒不記祥符中方有人見之按西域書阿羅漢語詎羅居震旦東南際大海鴈蕩山芙蓉龍湫唐貫休為詔詎羅贊有鴈蕩總行雲漠漠龍湫宴坐雨濛濛句此山南有芙蓉峰下有芙蓉驛前臨大海未知鴈蕩龍湫所在後因伐木見山頂有大池相傳以為鴈蕩下有二潭以為龍湫云經行峽宴坐峰則後人因貫休詩名之者後漢龐公常人鹿門山采藥不返吳閩集淳于棼醉夢一紫衣吏召棼曰大槐安國王致命以為南柯太守及覺尋其所經由乃宅南大槐下蟻穴耳張平子西京賦綴以二華註大華少華也枉子美將適吳楚詩不意青草湖扁舟落吾手

西湖三載與君同馬入塵埃鶴入籠東海獨來看出口石橋先去踏長虹遙知別後添華髮時向樽前說病翁所恨蜀山君未見他年攜手醉郵筒

齊地記秦始皇作石橋欲過海看日出處有神能驅石下海石去不速神輒鞭之石皆流血山志天台山石橋廣不盈尺長數十丈下臨絕澗渡得平路上有瓊樓玉闕碧林醴泉瑤草神奇莫可名狀舊稱金庭洞天華陽風俗錄鄉人剗竹為筒藥酒筒中閉以藕絲包以蕉葉信宿香達於外然後斷之俗號郵筒酒成都記郵

縣因水得名杜子美
詩酒憶鄭簡不用沽

送碧香酒與趙明叔教授

趙明叔教授膠西人

聞君有婦賢且廉勸君慎勿為楚相不羨紫駝分御食
自遣赤腳沽村釀嗟君老狂不知愧更吟醜婦惡嘲謗
諸生聞語定失笑冬暖號寒臥無帳碧香近出帝子家
鵝兒破殼酥流盎不學劉伶獨自飲一壺往助齊眉餉
史記滑稽傳優孟為叔敖衣冠抵掌談語歲餘像孫叔敖莊王置酒優孟前為壽王大驚欲以為相優孟曰請歸與婦計之三日後復來曰婦言慎無為楚相不足為也如孫叔敖盡忠為廉以治楚今死其子無立錐之地必如叔敖不如自殺於是莊王謝優孟召叔敖子封之寢邱又互見十卷寄呂穆仲詩注杜子美麗人行紫駝之峰出翠釜又御廚絲絡送八珍韓退之寄盧仝詩一奴長鬚不裹頭一婢赤腳老無齒又進學解冬暖而兒號寒年豐而妻號饑都尉王詵家釀也楚辭屈原九歌帝子降兮北渚註帝子謂堯女娥皇女英也鵝兒用杜子美詩已見前注晉劉伶傳伶求酒於妻妻涕泣諫曰君酒太過必宜斷之伶曰善吾不能自

禁惟當祝鬼神自誓便可具酒肉妻從之伶跪祝曰天生劉伶以酒為名一飲一斛五斗解醒婦兒之言慎勿可聽仍引酒御肉塊然復醉又見十卷小兒詩注後漢梁鴻傳其妻孟光為具食不敢於鴻前仰視舉案齊眉

趙既見和復次韻答之

長安小吏天所放日夜歌呼和丞相豈知後世有阿瞞

公自注曹公自言參之後北海樽前捉私釀先生未出禁酒國詩語孤高

常近謗幾回無酒欲沽君卻畏有司書簿帳

公自注近制公使酒過數法甚重

酸寒可笑分一斗日飲亡何足袁盎更將險語壓衰翁

只恐自是臺無餉

莊子馬蹏篇一而不黨命曰大放漢曹參相舍歌呼已見四卷再和詩注後漢孔融傳曹操以年饑兵興表制酒禁融頗書爭之多侮慢之辭融嘗為北海相阿瞞操小字唐王績傳待詔門下省故事官給酒日三升或問待詔何樂答曰良醴可戀耳侍中陳叔達聞之日給一斗時稱斗酒學士漢袁盎注再見

趙郎中往莒縣逾月而歸復以一壺遺之仍用

前韻

東鄰主人游不歸悲歌夜夜聞春相門前人鬧馬嘶急
一家喜氣如春釀王事何曾怨獨賢室人豈忍交謫謗
大兒踉蹌越門限小兒咿啞語繡帳定教舞袖掣伊涼
更想夜庖鳴甕盎題詩送酒君勿謂免使退之嘲一餉

曲禮春不相史記商君傳童子不歌謠春者不相梓詩小雅我從事獨賢又國風
我入自外室人交偏謫我韓退之贈張籍詩有兒雖甚憐教示不免簡君來好呼
出踉蹌越門限漢東方朔傳侯嬴者辭未定也韓退之醉贈張秘書詩長
安眾富見盤饌羅羶葷不解文字飲惟能醉紅君雖得一餉樂有如聚飛蚊

蘇潛聖挽詞

蘇潛聖名泳成都新繁人舉進士知乾州邛州官
至職方郎中致仕其子名槩亦登第終著作郎

妙齡馳譽百夫雄晚節忘懷大隱中悃悞無華真漢吏

文章爾雅稱吾宗趨時肯負平生志有子還應不死同
惟我閑思十年事數行老淚寄西風

後漢章帝紀元和二年詔曰安靜之吏悃悞無華杜子美詩出門搔白首苦負平
生志左傳昭六年季平子曰子服氏有子哉三國吳張溫傳孫權問公卿曰溫當
今與誰為比顧雍曰當今無
輩權曰如是張允不死也

和鼂同年九日見寄

仰看鸞鵠刺天飛富貴功名老不思病馬已無千里志
騷人長負一秋悲古來重九皆如此別後西湖付與誰
遣子窮愁天有意吳中山水要清詩

韓退之祭柳子厚文一斥不復羣飛刺天管王敦傳每酒後輒詠魏武樂府曰老
驥伏櫪志在千里烈士暮年壯心不已楚辭宋玉九辨悲哉秋之為氣也又皇天
平分四時兮竊獨悲此稟秋杜牧之九日詩古往今來只如此牛
山何必獨沾衣白樂天讀李杜集詩天意君須會人間要好詩

送喬施州

王注喬敘字禹功嘗以太博換左藏知欽州其後除知施州

恨無負郭田二頃空有載行書五車江上青山橫絕壁
雲閒細路躡飛虵雞號黑暗通蠻貨蜂鬧黃連採蜜花
共怪河南門下客不應萬里向長沙

公自注喬受知於吳丞相而施州風土大類長沙

負郭田注再見前莊子惠施多方其書五車西陽雜俎波斯人謂牙為白暗犀為黑暗抱朴子通天犀有一白理如線者以蓋米置羣雞中雞往啄至輒驚卻故南人名曰駭雞犀也本草南中有蜜色黃味苦蜂銜黃連花作之

雪夜獨宿柏仙菴

晚雨纖纖變玉霰小菴高臥有餘清夢驚忽有穿牕片
夜靜惟聞瀉竹聲稍壓冬溫聊得健未濡秋旱若為耕
天公用意真難會又作春風爛漫一作晴

韓退之詩廉纖晚雨不能晴韓詩外傳雪花曰襄謝惠連雪賦始緣蓂而冒棟終開簾而入隙杜荀鶴雪詩巖谷惟聞折竹聲李太白答丁十一詩待得明朝酒醒罷與君爛漫尋春暉

和孔郎中荆林馬上見寄

孔宗翰字周翰宣聖五世孫與東坡密州為代未至以此詩先之

秋禾不滿眼宿麥種亦稀永媿此邦人芒刺在膚肌平
生五千卷一字不救饑方將怨無襦忽復歌緇衣堂堂
孔北海直氣凜羣兒朱輪未及郊清風已先馳何以累
君子十萬貧與贏滔滔滿四方我行竟安之何時劍關
路春山聞子規

漢書食貨志董仲舒曰願詔大司農使關中益種宿麥霍光傳若有芒刺在背北史崔儵傳天署其戶曰不讀五千卷書者無得人此室三國遺錄魏文帝云文為當代所宗讀書五千卷許登閣觀書登者才六人後漢廉范傳為蜀郡太守百姓歌之曰平生無襦今五袴詩小序緇衣美武公也後漢孔融傳融字文舉為北海

相禱退之詩不知羣兒愚那用故謗傷後漢輿服志中二千石二千石皆皂蓋朱兩轡其千石六百石朱左轡五城志劍門關隸利州路

畱別零泉

零泉記常山西南有泉乃琢石為井作亭其上而名之曰零泉古者謂吁嗟而求雨曰零

舉酒屬零泉白髮日夜新何時泉中天復照泉上人二年飲泉水魚鳥亦相親還將弄泉手遮日向西秦

世說晉簡文入華林園顧謂左右曰會心處不必在遠翳然林水便自有濠濮閒想也覺鳥獸禽魚自來親人杜牧之途中絕句惆悵江湖釣竿手卻遮西日向長安

畱別釋迦院牡丹呈趙倅

春風小院初

一作初

來時壁閒惟見使君詩應問使君何處

去憑花說與春風知年年歲歲何窮已花似今年人老

矣去年崔護若重來前度劉郎在千里

本事詩博陵崔護清明日游都城南從居人家求飲扣門久之有女子以杯水至獨倚小桃竹立意屬殊厚明年復往門巷如故而扁鎖寂然因題詩左扉曰人面

不知何處云桃花依舊笑春風劉郎用劉禹錫句注再見

董儲郎中嘗知眉州與先人游過安邱訪其故居見其子希甫留詩屋壁

白髮郎潛舊使君至今人道最能文隻雞敢忘橋公語

下馬來尋董相墳冬月負薪雖一作那得免鄰人吹笛不堪

聞死生契闊君休問灑淚西南向白雲

漢武帝至郎署見一郎負薪皓白問何時為郎對曰臣姓顏名馴以文帝時為郎文帝好文而臣好武景帝好老臣尚少陛下好少臣已老是以三葉不遇上感其言擢為會稽都尉張衡賦龐眉而郎潛兮遠三葉而蓮武後漢橋元傳魏武祭橋文云士死知已懷此無忘又承從容約誓之言祖歿之後路有經田不以斗酒隻雞過相沃酌車過三其腹痛勿怨按三國魏太祖紀祖歿作殂逝勿怨作勿怪國史補董仲舒墳在長安門人過必下馬故號下馬陵而語訛謂蝦蟇陵史記得稽傳孫叔敖死其子窮困負薪向子期思舊賦序余少與嵇康呂安居止接近其後各以事見法近將西邁經其舊廬子時日薄虞淵寒冰淒然鄰人有吹笛者發聲

劉貢父見余歌詞數首以詩見戲聊次其韻

劉貢父見余歌詞數首以詩見戲聊次其韻

十載飄然未可期那堪重作看花詩門前惡語誰傳
去醉後狂歌自不知刺舌君今猶未戒灸眉吾亦更何
辭相從痛飲無餘事正是春容最好時

杜牧之詩十載飄然繩檢外隋書賀若弼父敦臨刑呼弼謂曰吾以舌死汝不可
不思因引錐刺弼舌戒以謹口晉郭舒為王澄別駕荆上士人宗獻嘗因酒忤澄
怒叱左右棒厥舒屬邑謂左右曰使君過醉汝輩何敢妄動澄恚曰別駕狂邪因
遣相其鼻灸其眉舒跪而受之厥遂得免杜子美醉時歌志形到爾汝痛飲真吾師

除夜大雪留濰州元日早晴遂行中途雪復作

除夜雪相留元日晴相送東風吹宿酒瘦馬兀殘夢
曉光開旋轉餘花弄下馬成野酌佳哉誰與共須臾

晚雲合亂灑無缺空鵝毛垂馬駿自怪騎白鳳
三年東方旱逃戶連欹棟老農釋耒歎淚入饑腸
痛春雪雖云晚春麥猶可種敢怨行役勞助爾歌飯
饗

劉駕早行詩馬上兀殘夢馬嘶時復驚白樂天詩門前雪片似鵝毛曹唐游
仙詩不知今夜游何處侍從皆騎白鳳凰農諺霜淞打霧恹窮漢備飯饗

大雪青州道上有懷東武園亭寄孔周翰

超然臺上雪城郭山川兩奇絕海風吹碎碧琉璃
時見三山白銀闕蓋公堂前雪綠牕朱戶相明滅
堂中美人雪爭妍粲然一笑玉齒頰就中山堂雪
更奇青松怪石亂瓊絲惟有使君游不歸五更上
馬愁斂眉君不見淮西李侍中夜入蔡州縛取吳
元濟又不見襄陽孟浩然

長安道上騎驢吟雪詩何當閉門一作飲美酒無人毀譽

河東守

杜子美詩天地黯慘忽異色波濤萬頃堆琉璃史記封禪書三神山其物禽獸盡白金銀為宮闕唐李愬討吳元濟會大雪夜入蔡城黎明禽元濟檻送京師王注或問鄭祭詩思對曰詩思在灞橋雪中驢背上又浩然有長安道中雪詩史記季布為河東守孝文時人有言其賢名欲以為御史大夫夫人又言其勇使酒難近至留邸一月見罷布進曰陛下以一人譽名臣以一人毀去臣臣恐天下有識者有以窺陛下也

至濟南李公擇以詩相迎次其韻二首公擇知湖州東坡以

杭倅來會今自高密官滿過濟南而公擇復為守在焉

弊裘羸馬古河濱野闊天低糝玉塵自笑餐氎典屬國
來看換酒謫仙人宦游到處身如寄農事何時手自親
剩作新詩與君和莫因風雨廢鳴晨

何遜詠雪詩時逐微風起誰言非玉塵餐氎漢蘇武事武還至京師拜典屬國注已見前據言賀知章一見李白呼為謫仙人因解金龜換酒為樂詩國風風雨如晦鷄鳴不已杜子美催樹鷄樹詩不昧風雨辰亂離減憂感

夜擁笙歌雪水濱回頭樂事總成塵今年送汝作太守
到處逢君是主人聚散細思都是夢身名漸覺兩非親
相從繼燭何須問蝙蝠飛時日正晨

送人作守羅友事見三卷送呂希道詩注老子名與身孰親不傳莊二十二年飲齊桓公酒樂公曰以火繼之蝙蝠注已見七卷

和孔君亮郎中見贈

偶對先生盡一樽醉看萬物洶崩奔優游共我聊卒歲
骯髒如君合倚門只恐掉頭難久住應須傾蓋便深論
固知嚴勝風流在又見長身十世孫公自注殘字君嚴弟撰字君勝退之志其墓云孔世

川八吾見其孫白而長
身今君亮四十八世矣
謝靈運入彭蠡詩岸屢崩奔史記孔子世家優哉游哉
維以卒歲翫麟倚門用趙壹句詳見七卷明日重九詩注

古香齋鑒賞袖珍施註蘇詩卷之十一

古香齋鑒賞袖珍施註蘇詩卷之十二

長洲顧嗣立

商邱宋 學

閱定 毗陵邵長蘅 刪補

滄陽張榕端

商邱宋 至

詩四十首 起丁巳春留京師至四月之官彭城以後作

送范景仁游洛中

小人真闢事閒退豈公難道大吾何病言深聽者寒憂
時雖蚤白住世有還丹得酒相逢樂無心所遇安去年
行萬里蜀路走千盤投老身彌健登山意未闌西游為
櫻筍東道盡鷓鴣杖屨攜兒去園亭借客看折花斑竹

寺弄水石樓灘鬻馬衰憐白驚雷怯笑韓蘇書標洞府

公自注歐陽永叔嘗游嵩山日暮於絕壁松蓋偃天壇試與劉夫子

上見蘇蘇成文云神清之洞明日復尋不見

重尋靖長官 公自注劉几云曾見人嵩山陶絕處眼光如貓意其為靖

史記孔子世家顏回曰夫子之道至大故天下莫能容雖然夫子推而行之不容

何病不容然後見君子戰國策馮忌見趙王曰服子曰客交淺而言深是亂也客

曰不然交淺而言深是忠也按景仁嘗累疏力詆王安石安石大怒持其疏至手

顛故云聽者寒慄再經有大小還丹素中歲時記唐有櫻筍耐百樂天歌馬吟忽

憶家園須速去櫻桃欲熟筍應生左傳舊三十年舍鄭以為東道主世說陳太邱

請前朗陵貧無僕役乃使元方將車季方持杖從後唐白居易致仕洛中既老

又病風將鬻其駱馬馬悲鳴復留之作不能忘情吟又有齊駱馬詩嵩山韓退之

題名云元和四年二月二十六日與樊宗師盧全自洛中至少室謁李渤遂至龍

潭下釣遇雷明日乃歸歐陽集古跋尾右韓退之題名在洛陽嵩山天封宮石柱

上刻之記龍潭遇雷事余為西京留守推官游嵩山入天封宮登山頂之武后封

禪處有石記戒人游龍潭者毋語笑以驢神龍怒則有雷

恐因念退之記遇雷意其有所誠也九域志洛陽有天壇山

次韻景仁留別

公老我亦衰相見恨不數臨行一杯酒此意重山嶽歌

詞白紵清琴弄黃鐘濁詩新眇難和飲少僅可學欲參

兵部選有力誰如榮且作東諸侯山城雄鼓角南游許

過我不憚千里邈會當聞公來倒屣髮一作握

稀叔夜養生論從衰得白從自得老沈約別范安成詩及爾各衰暮非復別離時

勿言一杯酒明日難重持樂府解題白紵吳地所出白紵舞本吳舞也梁武帝合

唐選舉志武選兵部主之朝野僉載崔湜為吏部侍郎有選人白湜曰某能翹關

負米湜笑曰若壯何不選兵部答曰外議謂侍郎下有氣力者即得選左傳莊三

十二年雲講於梁氏女公子觀之聞人聲自牆外與之戲子般怒使鞭之公曰不

如殺之是不可鞭榮有力焉能投蓋於櫻門晉嵇康傳官安服康高致每一相思

千里命駕三國王粲傳蔡邕聞琴在門倒屣迎之史記魯世家周公一沐三握髮

書韓幹牧馬圖

吐哺

南山之下汧渭之間想見開元天寶年八坊分屯隘秦
 川四十萬匹如雲煙騅駟駱駘驪駟驪駟白魚赤兔驊皇
 輪切龍顱鳳頸獐且妍奇姿逸德隱鴛頰碧眼胡兒手
 足鮮歲時翦刷供帝閑柘袍臨池侍三千紅糒照日光
 流淵樓下玉螭吐清寒往來蹙同踏生飛湍眾工舐筆
 和朱鉛先生曹霸弟子韓廐馬多肉尻切誰圓肉中
 畫骨誇尤難金羈玉勒繡羅鞍鞭箠刻烙傷天全不如
 此圖近自然平沙細草荒芊綿驚鴻脫兔爭後先王良
 挾策飛上天何必俯首服短轅

史記秦始皇紀非子好馬周孝王召使主馬於汧渭之間唐兵志唐初得突厥馬二千匹又得隋馬三千於赤岸澤徙之隴右監牧之制始於此用張萬歲領羣牧

自貞觀麟德四十年間馬七十六萬六千置八坊岐幽涇靈開地廣千里自萬歲失職馬政廢廢開元初國馬益耗及王毛仲領內外閑廐馬稍稍復始二十四萬至十三年及四十三萬王毛仲傳從帝東封牧馬數萬疋每色一隊相間如錦繡天子才之狂子美天育騾騎歌當時四十萬疋馬張公歎其才盡下詩駟頌看騅有駮又駟駱驪魚驊皇俱見駟頌駟驪見爾雅赤兔呂布馬名唐韻駮騅番大馬劉琬馬賦龍頭烏目麒麟虎骨杜胡馬行鳳騰麟鬣未易識南禮稜入掌土馬之政天子十有二閑馬六種六曲曰隋文帝服柘袍巾帶聽朝遂以為常莊子田子方篇宋元君將畫圖眾史皆至紙筆和墨在外者半杜子美丹青引贈曹將軍弟子韓幹早入室亦能畫馬窮殊和幹惟畫肉不畫骨忽使驪駒氣凋喪漢東方朔傳結股脚連雁尻莊子馬蹄篇伯樂曰我善治馬燒之剔之刻之維之運之以羈馬編之以皂棧馬之死者十二三矣曹植賦駟若驚鴻穿若游龍史記田單傳後如脫兔敵不及拒天文志漢中四星曰天駟旁四星曰王良王良策馬車駟滿野漢王褒傳及至駕齧齧乘且王良執靶韓哀附輿縱馳騁騖忽如景靡過都越國蹶如歷塊追奔電逐遺風漢灌夫傳局促効轅下駒

送魯元翰少卿知衛州

公自密移守河中至京師改徐州時有旨不許入國門寓城外范蜀

公園故首句云云魯元翰名有開乃肅簡公之姪自知南康代還王介甫問江南如何元翰對新法當為異日患介甫怒僅得俸杭公時亦為杭俸與魯同官魯先代去七卷有壽星寺餞魯少卿詩即元翰也

冗士無處著寄身范公園桃花忽成陰薺麥秀已繁閉
門春晝永惟有黃蜂喧誰人肯攜酒共醉榆柳村髯卿
獨何者一月三到門我不往拜之髯來意彌敦堂堂元
老後豐豐仁人言憶在錢塘歲情好均弟昆時於冰雪
中笑語作春溫欲飲徑相覓夜開叢竹軒搜尋到篋笥
鮓醢無復存每愧煙火中玉腕親炮燔別來今幾何相
對如夢魂告我當北渡新詩侑清樽坡陀太行麓洶湧
黃河翻仕宦非不遇王畿西北垣斯民如魚耳見網則
驚奔皎皎千丈清不如尺水渾刑政雖首務念當養其
源一聞襦袴音盜賊安足論

蜀關羽傳猶未若髯之絕倫逸羣也晉謝安傳弱冠詣王濛濛曰此客豐豐焉為來
通人左傳昭三年君子曰仁人之言其利溥哉杜子美貽柳少府詩柳侯披衣笑
見我顏色溫又醉時歌得錢卽相覓沽酒不復疑小說載詩云吹火紅唇動擅薪
玉腕斜遙觀煙裏面恰似霧中花事見孟啓本事詩襦袴用後漢廉范事見前卷
和孔郎
中詩注

次韻子由送蔣夔赴代州學官

功利爭先變法初典刑獨守老成餘窮人未信詩能爾
倚市懸知繡不如代北諸生漸狂簡牀頭雜說爲爬梳
歸來問鴈吾何敢疾世王符解著書

史記貨殖傳刺繡文不如倚市門東漢王符隱居著書三十篇以譏當世得失號
曰潜夫論又皇甫規解官歸安定鄉人有以貨得鴈門太守者亦去職還家書刺
謁規規臥不迎既入問卿在郡食鴈美乎有頃又曰王符在門規素聞符名乃驚
遽而起衣不及帶屣履迎門援符手而還與同坐極歡時人爲之語曰徒見二千
石不如
一逢掖

宿州次韻劉涇

劉涇字巨濟

我欲歸休瑟漸希舞雩何日著春衣多情白髮三千丈
無用蒼皮四十圍晚覺文章真小伎早知富貴有危機
為君垂涕君知否千古華亭鶴自飛

公自注涇之兄亦亦有文死矣

李白秋浦歌白髮三千丈綠愁似箇長杜子美古柏行霜皮溜雨四十圍黛色參天二十丈富貴危機晉諸葛長民語見七卷韓子華石淙莊詩注晉書陸機臨死歎曰華亭鶴唳豈可復聞乎

和李邦直沂山祈雨有應

高田生黃埃下田生蒼耳蒼耳亦已無更問麥有幾蛟
龍睡足亦解慙二麥枯時雨如洗不知雨從何處來但
聞呂梁百步聲如雷試上城南望城北際天菽粟青成

堆饑火燒腸作牛吼不知待得秋成否半年不雨坐龍
慵其怨天公不怨龍今朝一雨聊自贖龍神社鬼各言
功無功日盜太倉穀嗟我與龍同此責勸農使者不汝
容因君作詩先自劾

杜子美詩雨降不濡物良田起黃埃莊子達生篇孔子觀於呂梁縣水三十仞流沫四十里王注呂梁今謂百步洪在彭城郡東龍神見法華經社鬼見漢王莽傳漢孫寶傳張忠辟為屬欲令授子經更為除舍設儲待寶自劾去韓退之詩家請官供不報答無異鼠雀偷太倉行抽手版付丞相不待彈劾還耕桑公詩亦此意

和孔密州五絕

見邸家園留題

大旆傳聞載酒過小詩未忍著磚磨陽關三疊君須祕

公自注來詩有渭城之句除卻膠西不解歌

王注漢於燉煌龍勒縣置陽關後人因以陽關名曲按先生詩話舊傳陽關三疊然今世歌者每句再疊而已若通一首言之又是四疊皆非是或每句三唱以應三疊之說則叢然無復節奏余在密州有文勛長官者以事至密自云得古本陽關其聲宛轉凄斷不類向之所聞每句皆再唱而第一句不疊乃知古本三疊蓋如此及在黃州偶讀樂天對酒詩云相逢且莫推辭醉聽唱陽關第四聲注云第四聲勸君更盡一盃酒以此驗之則第一句不疊審矣

春步西園見寄

歲歲開園成故事年年行樂不辜春今年太守尤難繼

慈愛聰明惠利人

漢馬奉世傳奉世子野王與弟立相代為上郡太守治行畧相似吏民歌之曰大馬君小馬君兄弟繼踵相因循聰明賢知惠吏民

東欄梨花

梨花淡白柳深青柳絮飛時花滿城惆悵東欄一株雪
人生看得幾清明

韓退之詩走馬城西惆悵歸不忍千株雪相映

和流杯石上草書小詩

蜂腰鶴膝嘲希逸春蚓秋蛇病子雲醉裏自書醒自笑
如今二絕更逢君

南史齊陸厥傳永明時盛為文章吳興沈約陳郡謝朓琅邪王融以氣類相推較汝南周顒善識聲韻約等文皆用四聲制韻有平頭上尾蜂腰鶴膝之病世呼為永明體又謝莊字希逸王元謨問何者為雙聲疊韻答曰元瓠為雙聲嶽嶠為疊韻晉王羲之傳蕭子雲近出擅名江表然僅得成書無丈夫之氣行行若紫春蚓字字如縮秋蛇唐張旭每醉或以頭濡墨而書既醒自視以為神不可復得也南史顧野王傳宣城王為揚州刺史野王及王褒並為賓客王於東府起齋令野王書古賢王褒書贊時稱為二絕

堂後白牡丹

城西千葉豈不好笑舞春風醉臉丹何似後堂冰玉潔

游蜂非意不相干

公自注孔頗有聲
效而客無見者

後堂用張禹傳字詳見八卷張子野年八十五詩注晉衛玠傳嘗謂
人有不及可以情恕非意相干可以理遣故終身不見喜怒之容

和趙郎中見戲

公自注趙以徐妓不如東武詩
中見戲云只有當時燕子樓

燕子人亡三百秋

卷

簾那復似揚州西行未必能勝

此空唱崔徽上白樓

白樂天燕子樓詩序徐州故尚書張建封愛妓曰盼盼張既沒第中有小樓名燕
子盼盼念舊愛而不肯嫁居是樓十餘年幽獨塊然卷簾用杜牧之詩已見四卷
吉祥寺賞牡丹詩注麗情集元微之崔徽傳云蒲女也裴敬中使蒲徽一見動情
不能忍敬中使回徽以不得從為恨久之成疾寫真以寄裴且曰崔徽一日不及
卷中人矣微之為作崔徽歌三國呂布傳魏太祖圍沛布
登白門樓圍急乃下降酈道元水經註南門謂之白門

我擊藤牀君唱歌明年六十奈君何

公自注趙每醉歌卒顛
畢輒曰明年六十矣

只要裴風景莫向人前自洗磨

和子由與顏長道同游百步洪相地築亭種柳

平明坐衙不暖席歸來閉閣閑終日臥聞客至倒屣迎
兩眼蒙籠餘睡色城東泗水步可到路轉河洪翻雪白
安得青絲絡駿馬蹙踏飛波柳陰下奮身三丈兩蹄間
振鬣長鳴身自乾少年狂興久已謝但憶嘉陵遶劍關
劍關大道車方軌君自不去歸何難山中故人應大笑
築室種柳何時還

漢書汲黯傳黯多病臥閣內不出歲餘東海大治史記張儀傳秦馬之良探前跌
後蹄間三尋騰者不可勝數三國志注劉備乘馬名的盧走檀溪中溺不得出
備急曰的盧今日死矣可努力乃一踴三丈遂得出九域志嘉陵江在果州一說
出大散關南行劍門關東向關中與涪水會戰國策蘇秦說齊宣王曰亢父之險
車不得方軌
馬不得並行

次韻李邦直感舊

騶騎傳呼出跨坊簿書填委入充堂誰教按部如何武
只許清樽對孟光婉婉有時來入夢溫柔何日聽還鄉
酸寒病守尤堪笑千步空餘僕射場

漢東方朔傳注騶奉既之御也後以為騎謂之騶騎蕭望之傳仲翁出入從倉頭
盧見下車趨門傳呼甚寵注出而騶騎傳呼則凌跨坊巷入而簿書填委則充
滿堂廳或云跨坊乃籠街之義劉公幹詩職事煩填委文墨紛消散漢書何武傳
行部必先即學官見諸生試其誦論問以得失然後入傳舍出記問選田頃畝五
穀美惡已過見二千石以為常韓退之詩孤游懷耿介旅宿夢婉婉翹飛燕外傳
成帝見合德曰吾當老此溫柔鄉不復效武皇老白雲鄉也韓贈張僕射詩汴泗
交流郡城角廟
場千步平如削

與梁先舒煥泛舟得臨釀字二首

彭城古戰國孤客勸登臨汴泗交流處清潭百丈深故

人輕千里足蟹來相尋何以娛佳客潭水洗君心

彭城徐州也古大彭氏國自春秋至唐末多戰爭之地漢高項羽劉裕皆起彭城
晉嵇康傳呂安服其高致每一相思千里命駕戰國策蘇秦足重蟹日百而舍造
外闕願見於前口道天下之事李太白詩君思
潁水淥忽復歸嵩山歸時莫洗耳為我洗君心

老守厭簿書先生罷函丈風流魏晉閒談笑羲皇上河

洪一作洪忽已過水色綠可釀君無輕此樂此樂清且放

禮記非飲食之客則布席席閒函丈鄭氏謂講問之客也王注魏晉
間士尚清談慕達節視名教史事為俗又陶淵明自謂羲皇上人

次韻答邦直子由四首

增收一首公詩案云李清臣寄軾
弟轍詩二首批云可求子瞻和軾

御作詩二首和李清臣其內一首首句云五斗塵勞尚足留集中
失載此詩今附於後又云軾又用弟轍韻與李清臣六首蓋東坡
次韻通為八首集中止有四首今收詩案一首猶逸其
三也按所收詩施本又闕其半無他本可校姑仍之

簿書顛倒夢魂閒知我疎慵官見原閑作閉門僧舍冷

病聞吹枕海濤喧忘懷杯酒逢人共引睡文書信手翻

欲吐狂言喙三尺怕君嗔我卻須吞公自注邦直屢以此見戒

韋應物郡齋詩惟我出塵意賞愛似僧家白樂天詩引睡臥看書莊子徐無鬼丘願有喙三尺朝野僉載陸餘慶為洛州善論事而謬於判事時嘲之曰說事喙長三尺判事手重五斤

城南短李好交游箕踞狂歌總自由尊主庇民君有道

樂天知命我無憂醉呼妙舞留連夜公自注邦直家閑作清中舞者甚多

詩斷送秋蕭灑使君殊不俗樽前容我攬鬚不

繫辭樂天知命故不憂杜子美詩留連春夜舞攬鬚用相伊撫掌事三見

老弟東來殊寂寞故人留飲慰酸寒草荒城角開新徑

雨入河洪失舊灘車馬追陪迹未掃唱酬往復字應漫

此詩更欲憑君改待與江南子布看

韓退之詩酸寒溧陽尉後漢杜密傳劉勝自蜀郡告歸鄉里閉門掃軌註云軌車迹也後漢顧衡傳初達潁川陰懷一刺無所之適至刺字漫滅與畧不異問劉荆州嘗自作書欲與孫伯符以示嗣正平平蚤之言如是為欲使孫策帳下兒讀之邪將使張子布見乎

君雖為我此遲留別後淒涼我已憂不見便同千里遠

退歸終作十年遊恨無揚子一區宅懶臥元龍百尺樓

聞道鶴鴻滿臺閣網羅應不到沙鷗

三國志陳登字元龍許汜見先主曰元龍湖海之士豪氣不除昔遭亂過下邳見元龍無客主之意久不相與許自上大牀臥使客臥下牀劉備曰君有國士之名而求曰問舍言無可採是元龍所許也何緣當與君語如我欲臥百尺樓一臥君於地何但上下牀之間邪後漢儒林傳網羅遠博存衆家

五斗塵勞尚足留閉關卻欲治幽憂羞為毛遂囊中穎

龍逢地下遊缺

文子或問劉靈何人也曰古之閉關人也爾曼字出莊子已見前注更記平原君傳秦圍邯鄲平原君求救合從於楚取於門下客得十九人有毛遂者自贊備員曰使遂得處囊中乃穎脫而出漢朱雲傳臣願賜尚方斬馬劍斷佞臣一人以厲其餘上問曰誰也對曰安昌侯張禹上大怒御史將雲下雲攀殿檻檻折雲呼曰臣得從龍逢比干遊於地下足矣

司馬君實獨樂園

青山在屋上流水在屋下中有五畝園花竹秀而野花香襲杖屨竹色侵盞尊樽酒樂餘春棋局消長夏洛陽古多士風俗猶爾雅先生臥不出冠蓋傾洛社雖云與眾樂中有獨樂者才全德不形所貴知我寡先生獨何事四海望陶冶兒童誦君實走卒知司馬持此欲安歸造物不我捨名聲逐吾輩此病天所赭撫掌笑先生年

來效嗜啞

孟浩然符公蘭若詩綠篠夾路芳清泉流舍下柳子厚蓋屋縣食堂記青山在前流水在下可以俯仰可以蒞樂灑水燕談司馬文正公以高才全德大得中外之望士大夫識與不識稱之曰君實下至閭閻賦賦匹夫匹婦莫不能道司馬公身退十餘年而天下之人日冀其復用於朝漢蒯通傳足下欲持是安歸乎三國鍾會傳謂所親曰我淮南已來畫無遺策四海共知持此安歸後漢法真傳友人郭正稱之曰逃名而名我隱避名而名我追王注古者刑人情衣若進于天刑之意耳舊注用始皇藉山非是烏臺詩案供此詩言四海蒼生望司馬光執政陶冶天下以識見任執政不得其人又譏新法處處不便也

送顏復兼寄王鞏

顏復字長道魯人父名太初字醇之先師充六四十七世孫號冕釋先生東坡為叙其文嘉祐中訪遺逸京東以長道應詔試者二十二人復為第一賜進士出身元祐初入為太常博士遷遷二史經筵西掖以病改待制未拜而卒鞏字定國

彭城官居冷如水誰從我遊顏氏子我衰且病君亦窮
衰窮相守正其理胡為一朝捨我去輕衫觸熱行千里

問君無乃求之歟答我不然聊爾耳京師萬事日日新
故人如故今有幾君知牛行相君宅扣門但覓王居士
清詩草聖俱入妙別後寄我書連紙苦恨相思不相見
約我重陽嗅霜藥君歸可喚與俱來未應指目妨進擬
太一老仙閑不出公自注張安道為中太一宮使華安道壻也踵門問道今時矣因
行過我路幾何願君推挽加鞭箠吾儕一醉豈易得買
羊釀一作釀酒從今始

韓退之贈張籍詩子又捨我去我懷焉所窮牛行輩大父文正公居牛行街見徐
度南應紀史記范曄傳鄭安平言於王稽曰臣里有張祿先生欲見君言天下
事其人有仇不敢書見王稽曰夜與俱來漢陳勝傳旦日卒中往往指目勝廣舊
唐書李珣傳文宗語珣曰實易直勸我凡宰相進擬五取三三取一韓退之詩買
羊醢酒
謝不敏

蝎虎

黃雞啄蝎如啄黍廳閒守宮稱蝎虎閣中繳尾伺飛蟲
巧捷功夫在腰膂跂跂脉脉善緣壁陋質從來誰比數
今年歲旱號蜥蜴狂走兒童鬧歌舞能銜渠水作冰雹
便向蛟龍覓雲雨守宮努力搏蒼蠅明年歲旱當求汝

漢東方朔傳上嘗使諸數家射覆置守宮孟下射之皆不能中朔曰臣以為龍又
無角謂之為蛇又有足跂跂脉脉善緣壁是非守宮即蜥蜴段公路北戶雜錄蠅
蜥以器養之食以丹砂體盡赤搗之以點女人支體終身不滅婢則點落故號守
宮顏師古漢書注亦云揚雄方言在澤中者謂之蜥蜴楊文公談苑魏摩言昔游
關中佛寺見沙門有善胡法者置蜥蜴囊中使童男女數十衣青衣同
聲呪曰蜥蜴蜥蜴與雲吐霧雨今滂沱放汝歸去歲旱為之頗有應

子由將赴南都與余會宿於逍遙堂作兩絕句
讀之殆不可為懷因和其詩以自解余觀子由

自少曠達天資近道又得至人養生長年之訣
而余亦竊聞其一二以爲今者宦游相別之日
淺而異時退休相從之日長旣以自解且以慰

子由云

子由逍遙堂詩序云轍幼從子瞻讀書未嘗一日相舍旣壯將遊宦四方讀韋蘇州詩至那知風雨夜復此對牀眠

惻然感之乃相約早退爲閑居之樂故子瞻始爲鳳翔幕府留詩爲別曰夜雨何時聽蕭瑟其後子瞻通守餘杭復移守膠西而轍滯留於淮陽濟南不見者七年熙寧十年二月始復會於涇陽之閒相從彭城留百餘日待宿於逍遙堂追感前約爲作二小詩其一載首卷與子由別於鄭州西門詩注其二云秋來東閣涼如水客至山公醉似泥困臥北牕呼不醒風吹松竹雨凄凄

別期漸近不堪聞風雨蕭蕭已斷魂猶勝相逢不相識
形容變盡語音存

李大自通塘曲相逢不相識出沒繞通塘後漢夏馥傳當錮事起馥自剪須變形隱匿姓名爲冶家傭形貌毀瘁人無知者弟靜遇馥不識聞其言聲乃覺而拜之

但令朱雀長金花此別還同一轉車五百年閒誰復在
會看銅狄兩咨嗟

陰真君金液還丹歌北方正氣爲河車東方甲乙成丹砂兩情合養歸一體朱雀調護生金花注云朱雀火也後漢劉子訓傳人於長安東霸城見之與一老翁共摩挲銅人相謂曰適見鑄此今已近五百歲矣

留題石經院三首

蔥蒨門前路行穿翠密中卻來堂上看巖谷意無窮

天矯庭中檜枯枝鵲踏消瘦皮纏鶴骨高頂轉龍腰

窈窕山頭井潛通伏澗清欲知深幾許聽轉作輓轡聲

過雲龍山人張天驥

郊原雨初足風日清且好病守亦欣然肩輿白門道荒

田咽蛩蚓村巷懸梨棗下有幽人居閉門空雀噪西風
高正厲落葉紛可掃孤童臥斜日病馬放秋草墟里通
有無垣牆任摧倒君家本冠蓋絲竹鬧鄰保脫身聲利
中道德自濯澡躬耕抱羸疾奉養百歲老詩書膏吻頰
菽水媚翁媪鳥老反饑寒天隨子杞菊自擷苳慈孝董邵南
雞狗相乳抱吾生如寄耳歸計失不蚤故山豈敢忘但
恐迫華皓從君好一作學種秫斗酒時自一作相勞

白門見本卷和趙郎中見戲詩注顏延年詩仄同幽人居郊扉常晝閉晉陶潛傳躬耕自資遂抱羸疾揚雄方言周晉秦隴謂父曰翁漢高祖紀每媪注幽州及漢中皆謂老嫗為媪又曰媪女老稱也陸龜蒙杞菊賦序天隨生宅荒前後皆樹以杞菊春苗恣肥得以采擷詩國風采芣苢薄言擷之又參差苕菜左右苳之董邵南事詳十卷蘇州姚氏三瑞堂詩魏明帝樂府人生如寄多憂何為法死珠林文通在剡謝安與書云人生如寄耳終日戚戚遲君來以晤言消之種秫用陶潛

事注見七卷漢楊惲傳田家作苦歲時伏臘烹羊包羔斗酒自勞

贈王仲素寺丞公自注名景純

養氣如養兒棄官如棄泥人皆笑子一作子拙事定竟誰迷
歸耕獨患貧問子一作子何所齋尺宅足白庇寸田有餘畦
明珠照短褐陋室生虹霓雖無孔方兄顧有法喜妻彈
琴一長嘯不答阮與嵇曹南劉夫子名與子政齊家有
鴻寶書不鑄金裹蹄促膝問道要遂蒙分刀圭不忍獨
不死尺書肯見梯我生本強鄙少以氣自擠孤舟倒江
河赤手攬象犀年來稍自笑留氣暖下臍苦恨聞道晚
意象颯已凄空見孫思邈區區賦病梨

老子專氣致柔能如嬰兒乎醫經欲養兒慎風池黃庭經寸田尺土以治生兩眉
 閒為上丹田心為絳宮田臍下三寸為下丹田晉魯褒錢神論錢之為體有乾坤
 之象親之如兄字曰孔方維摩經法喜以為妻慈悲以為女晉孫登傳登好讀易
 撫一弦琴見者皆親樂之文帝聞之使阮籍往與語不應嵇康又從之游三年問
 其所圖終不答長齋即孫登事注見八卷惠山謁錢道人詩劉夫子或云謂劉誼
 王注先生在惠州時有書與宜翁咨問道要自以杜門屏居胸中廓然實無荆棘
 有受道之質且曰或有外丹已成可助梨棗者望不惜分惠其書載毗陵後集一
 曰劉安世待制字器之曹南人得養生煉丹術公嘗師之漢楚元王傳劉向字子
 政本名更生淮南王有枕中鴻寶苑秘書言神仙使鬼物為金之術更生父德治
 淮南獄得其書更生幼而讀誦以為奇獻之上令典尚方鑄作事方多不驗乃下
 更生吏漢武帝紀太始二年詔更黃金為麟趾裹蹄韓愈博士李君墓誌余自袁
 州還京師襄陽乘舸邀我於蕭洲昇人曰我得祕藥不可獨不死今遺子一器襄
 陽孟簡也時為節度使唐盧照鄰得惡疾從孫思邈
 問養生之道庭前有病梨樹照鄰乃作賦以自悲

陽關詞二首

王注三詩各自說事意皆可以陽關之聲
 歌之乃聚為一處標其題曰陽關三絕云

受降城下紫髯郎戲馬臺前古戰場恨君不取契丹首
 金甲牙旗歸故鄉

漢匈奴傳令因杆將軍築受降城唐書朔方總管張仁愿於河北築三受降城以
 絕突厥南寇之路三國張遼問吳降人向有紫髯將軍為誰答曰孫會稽又見七
 卷戲馬臺在彭城南項羽所作蕭子顯齊書武帝為宋公在彭城九日出戲馬臺
 至今相承以為舊臺唐李華弔古戰場浩浩乎平沙無垠負不見人河水紫帶
 羣山糾紛亭長告余曰此古戰場也常覆三軍
 往往鬼哭天陰則聞兵書曰牙旗將軍之旗

右贈張繼愿

濟南春好雪初晴行到龍山馬足輕使君莫忘雪谿女
 時作陽關腸斷聲

唐地理志齊州濟南郡劉禹錫詩唱得陽關意外聲舊人惟有米嘉
 榮都昂樂府解題許永新歌奏慢聲喜音聞之氣勇愁者聞之腸斷

右答李公擇

李公擇先知湖州自湖移
 濟南公故以雪谿女戲之

暮雲收盡溢清寒銀漢無聲轉玉盤此生此夜不長好
 明月明年何處看

李太白詩小時不識月喚作白玉盤

右中秋月

和孔周翰二絕

再觀邸園留題

小園香霧曉蒙籠醉手一作守狂詞未必工魯叟錄詩應有

取曲收彤管邶風

詩國風邶女其變貽我彤管箋云彤管筆赤管也古者后夫人必有女史事無失小記以成法王注嘗聞高密老儒之言曰邶氏有賢婦孀居不嫁其節甚高故公此詩用靜女彤管邶風之風也

觀淨觀堂劾韋蘇州詩

弱羽巢林在一枝幽人蝸舍兩相宜樂天長短三千首

卻愛韋郎五字詩

莊子逍遙遊鷦鷯巢於深林不過一枝高士傳焦先作蝸牛廬呻吟其中注已見前白氏文集記樂天有文集七帙合六十七卷凡三千四百十七首舊唐書白居易與元微之書云韋蘇州歌行清麗之外頗近興調其五言又高雅閒澹自成一家之體全之兼筆者誰能及之然當蘇州在時人亦未甚愛重必待身後則愛之

京師吳任遵聖

任遵聖名效眉山人二卷有送任及通判黃州兼寄其兄孜作下篇答任師中即似也

十年不還鄉兒女日夜長豈惟催老大漸復成凋喪每聞耆舊亡涕泣聲輒放老任况奇逸先子推輩行文章得少一作得譽詩語尤清壯吏能復所長談笑萬夫上自喜作劇縣偏工破豪黨奮髯走猾吏嚼齒對姦將哀哉命不偶每以才得謗竟使落窮山青衫就黃壤宦游久不樂江海永相望退耕本就君時節相勞餉此懷今不遂

歸見纍纍葬望哭國西門落日銜千嶂平生惟一子抱
負珠在掌見之齟齬中已有食牛量他年如入洛生死
一相訪惟有王濬冲心知中散狀

禮記孔子泣然流涕晉阮籍傳文帝讓九錫公卿將勸進使籍爲其辭籍沉醉忘
作臨請府使取之見籍方據枋醉眠使者以告籍使書案使寫之無所改竄辭甚
清壯漢灌嬰傳景帝曰魏其沾沾自喜耳晉書袁甫嘗語何勗自言能爲劇縣最
問惟欲宰縣不爲臺閣職何也甫曰人各有能與不能奮身用前漢朱博事注已
見唐書張巡裂背血面齧齒皆碎潘安仁懷舊賦墳壘壘以接壠栢森森以攢植
杜子美詩堂中食見一珠新韓詩外傳男子八月生齒八歲而齟齬女子七月生
齒七歲而齟齬戶子虎豹之駒雖未成文已有食牛之氣韓愈別竇司直詩行當
挂其冠生死君一訪晉籍紹中散大夫康之子也紹始入洛或謂王戎曰昨於稠
人中始見嵇紹昂昂如野鶴之在鷄
羣戎曰君復未見其父爾濬冲戎字

答任師中家漢公

先君昔未仕杜門皇祐初道德無貧賤風采照鄉閭何

嘗疎小人小人自閑疎出門無所詣老史在郊墟門前
萬竿竹堂上四庫書高樹紅消梨小池白芙蓉常呼赤
脚婢雨中擷園蔬矯矯任夫子罷官還舊廬是時里中
兒始識長者車烹雞酌白酒相對歡有餘有如龐德公
往還葛與徐妻子走堂下主人竟誰歟我時年尚幼作
賦慕相如侍立看君談精悍實起予歲月曾幾何耆老
逝不居史侯最先沒孤墳拱桑樗我亦涉萬里清血滿
襟祛漂流二十年始悟萬緣虛獨喜任夫子老佩刺史
魚威行烏白蠻解辯請冠裾方當入奏事清廟陳璠璵
胡爲厭軒冕歸意不少紆上蔡有良田黃沙走清渠罷

亞百頃稻雍容十年儲閒隨李丞相搏射鹿與豬蒼鷹
 十斤重猛犬如黃驢豈比陶淵明窮苦自把鋤我今四
 十二衰髮不滿梳彭城古名郡乏人偶見除頭顱已可
 知幾何不樵漁會當相從去芒鞋老菑畬念子瘴江邊
 懷抱向誰攄賴我同年友相歡出同與冰盤薦文鮪公
注鮪鮪也戎濶常有玉笋傾浮蛆醉中忽思我清詩綴瓊琚知我少
一作諒一作諧教我時卷舒世事日反覆翩如風中旗雀羅弔
 廷尉秋扇悲婕妤升沈一何速喜怒紛眾狙作詩謝二

子我師甯與遠

王注先君言編禮也皇祐仁宗年號又老史名經字彥輔眉之老儒嘗作思子臺賦八甚稱之唐藝文志兩都各聚書四部以甲乙丙丁為次列經史子集四庫其

本有正副軸帶牙籤皆異色以別之三秦記漢武帝園有大梨如五升瓶落地則
 碎名含消黎漢陳平傳平家貧門外多長者車轍龐德公事詳十一卷寄題丁景
 純詩注漢揚雄傳先是司馬相如作賦弘麗温雅雄心壯之每作賦嘗擬之以為
 式杜子美詩草元吾豈敢賦或似相如漢嚴延年傳為人短小精悍敏捷於事梁
 益州記雋州其地接諸蠻部有烏蠻白蠻杜子美詩山帶烏蠻關又烏蠻瘴遠隨
 漢書終軍傳將有解編髮削左衽襲冠帶要衣裳而蒙化者焉注編讀曰辯逸論
 語番瓊魯之寶玉也孔子曰美哉遠而望之煥若也近而視之瑟若也罷亞禾名
 本作穠亞已見七卷注史記李斯傳為秦丞相下吏顧其子曰吾欲與若復牽黃
 犬俱出上蔡東門逐狡兔豈可得乎又見首卷石鼓詩注按師中嘗為蔡州新息
 令邑人愛之為買田故用上蔡東門事晉夏侯湛傳與潘岳友善每出同輿接茵
 周禮獻人春獻王鮪詩國風投我以木瓜報之以瓊琚雀羅衆狙注竝見前文選
 趙飛燕姊弟得幸班婕妤失寵作統扇曲云常恐秋節至涼飈奪炎熱棄捐篋笥
 中恩情中道絕甯遠甯武子遠伯玉也潘安
 仁閑居賦雖吾顏之云厚猶內媿於甯遠

古香齋鑒賞袖珍施註蘇詩卷之十二

古香齋鑒賞袖珍施註蘇詩卷之十三

商邱宋 犖

長洲顧嗣立

淦陽張榕端

閱定

毗陵邵長蘅

刪補

商邱宋 至

詩四十一首 時守彭城作

初別子由

我少知子由天資和而清好學老益堅表裏漸融明豈
獨為吾弟要是賢友生不見六七年微言誰與賡常恐
坦率性放縱不自程會合亦何事無言對空枰使人之
意消不善無由萌森然有六女包裹布與荆無憂賴賢

婦藜藿等大烹使子得行意青衫陋公卿明日無晨炊
倒牀作雷鳴秋眠我東閣夜聽風雨聲懸知不久別妙
理難一作重細評昨日忽出門孤舟轉西城歸來北堂上古
屋空崢嶸退食悞相從入門中自驚南都信繁會人事
水火爭念當閉閣坐頽然寄聾盲妻子亦細事文章固
虛名會須掃白髮不復用黃精

詩小雅雖有兄弟不如友生王注子山題先生像贊亦云人曰吾兄我曰吾師朝
野僉戴唐德宗夏中微行西明寺宋濟方葛巾捉鼻抄書上曰措大茶求一椀濟
曰鼎水方煎有茶可自潑之又問作何事業是何姓行濟曰姓宋第五應進士舉
須臾聞呼官家濟皇恐起拜上曰宋五大坦率後聞禮部放榜上令探濟無名曰
宋五又坦率也韋弘嗣博奕論所志不出一枰之上所務不過方罫之間唐韻枰
博局也莊子田子方篇東郭順子其為人也正容以悟物使人之意也消後漢梁
鴻傳妻荆釵布裙風雨聲用韋應物詩意王注南都則南京也時子山從張文定
簽書南京判為此別也韓集石鼎聯句妄使水火爭五代史弘肇傳會飲王章第

蘇逢吉戲之弘肇大怒以醜語詬逢吉由是將相如水火
杜子美丈人山詩掃除白髮黃精在君看他時冰雪容

次韻呂梁仲屯田

雨葉風花日夜稀一杯相屬竟何時空虛豈敢酬瓊玉
枯朽猶能出菌芝門外呂梁從迅急胸中雲夢自透遲
待君筆力追靈運莫負南臺九日期

庾信屏風詩風花直亂回唐孟遲懷鄭洎詩風蘭舞幽香雨葉墮寒滴柳子厚與
蕭侑書雖朽樹敗腐猶足蒸出芝菌以為瑞物呂梁雲夢注並見前宋武述征記
九月九日王登戲馬臺宴百僚賦
詩作者百餘人謝靈運最為工

章質夫寄惠崔徽真崔徽注已見

玉釵半脫雲垂耳亭亭芙蓉在秋水當時薄命一酸辛
千古華堂奉君子水邊何處無麗人近前試看丞相嗔

不如丹青不解語世間言語原非真知君被惱更愁絕

卷贈老夫驚老拙為君援筆賦梅花未害廣平心似鐵

郭子橫洞真祀元鼎元年起招靈閣有神女留一玉釵與帝帝以賜趙婕妤至昭帝元鳳中宮人猶見此釵共謀欲碎之明日視釵匣惟見白燕直飛昇天後宮人作釵因名玉燕釵李賀詩寒鬢斜釵玉燕光華嶽靈姻傳雲髮垂耳李太白詩清水出芙蓉天然去雕飾又李樂府有妾薄命篇杜子美麗人行三月三日天氣新長安水邊多麗人又慎莫近前丞相嗔楊貴妃遺事大液池有千葉白蓮帝指妃示左右曰何如我解語花杜子美絕句江上被花惱不徹無處告訴只顛狂唐皮日休桃花賦序余嘗嘉宋廣平之為相貞姿勁質剛態毅狀疑其鐵腸石心不解吐婉媚詞然梅花賦清便富艷得南朝徐庾體殊不類其為人也

王鞏屢約重九見訪既而不至以詩送將官梁

交且見寄次韻答之交頗文雅不類武人家有

侍者甚惠麗

知君月下見傾城破恨懸知酒有兵老守亡何惟日飲

將軍競病自詩鳴花枝不共秋欷帽筆陣空來夜斫營
愛惜微官將底用他年只好寫銘旌

南史江諮議有言酒猶兵也兵可千日而不用不可一日而不備酒可千日而不飲不可一飲而不醉唐韓偓詩酒衝愁陣出奇兵日飲競病注竝再見韓退之送孟東野序東野始以其詩鳴其高出魏晉不懈而及於古杜子美醉歌行筆陣獨掃千人軍吳志甘寧傳受敕出斫敵前營至二更時銜枚出斫敵敵驚動遂退自樂天詩畫聽笙歌夜斫營禮記銘明旌也以死者為不可別已故以其旗識之杜牧之詩黃壤不霑新雨露粉書空換舊銘旌

臺頭寺雨中送李邦直赴史館分韻得憶字入

字兼寄孫巨源二首

霜林日夜西風急老送君歸百憂集清歌窈眇入行雲
雲為不行天為泣紅葉黃花秋正亂白魚紫蟹君須憶
憑君說向髯將軍衰鬢相逢應不識

杜子美詩悲見生涯百憂集漢元帝紀帝自度曲被歌聲分削節度窮極幼眇外
威傳武帝悼李夫人賦惟幼眇之相羊註幼眇猶窈窕也列子秦青撫節悲歌聲
振林木響遏行雲五行志無雲而雨為雨泣鬻將
軍注再見白樂天詩相逢應不識滿頭白髮鬢

珥筆西歸近紫宸太平典冊不緣麟付君此事寧論晉
載我當時舊過秦門外想無千斛米墓中知有百年人

看君兩一作雙眼明如鏡休把春秋坐素臣

文選曹植表執鞭珥筆註戴筆也潘岳贈陸機詩優游省闕珥筆華軒史記孔子
世家西狩獲麟曰吾道窮矣乃因史記作春秋晉陳壽傳壽撰三國志時人稱其
善敘事有良史之才張華深善之謂壽曰當以晉書相付耳賈誼過秦論史記秦
本紀漢書項籍傳皆載其略晉陳壽傳丁儀丁真有成名於魏陳壽謂其子曰可
覓千斛米當為尊公作佳傳子不與竟不作傳集異記鄭郊過一冢上有竹兩竿
青翠可愛吟曰墓上兩竿竹風吹長裊裊久不能續忽聞冢中人賡之曰下有百
年人長眠不知曉王注詩意言必不如陳壽之希求當念墓中之人而發其潛光
也韓退之論史書左邱明紀春秋時事以失明杜預左氏傳序說者以為仲尼自
衛反魯脩春秋立素王邱明為素臣漢昭帝紀大將軍國家忠臣敢有譖毀者坐
之公詩案熙寧十年九月內李清臣差知國史賦作詩送清臣云付君此事寧論

晉載我當時舊過秦賦於仁宗朝曾進論往古得失賦
妄以賈誼自比意欲李清臣於國史中載賦所進論也

代書答梁先

此身與世真悠悠蒼顏華髮誰汝留強名太守古徐州
忘歸不如楚沐猴魯人豈獨不知邱躡藉夫子無罪尤
異哉梁子清而脩不遠千里從我游瞭然正色懸雙眸
世之所馳子獨不一經通明傳節侯小楷精絕規摹歐
公自注梁生
學歐陽公書我衰廢學懶且媮畏見問事賈長頭別來紅
葉黃花秋夜夢見之起坐愁遺我駁石盆與甌黑質白
章聲琳球謂言山石生澗溝追琢尚可王公差感子佳
意能無酬反將木瓜報珍投學如富貴一作賈在博收仰取

俯拾無遺籌道大如天不可求修其可見致其幽願子
篤實慎勿浮發憤忘食樂忘憂

漢百官表郡守秦官景帝中二年更名太守家語魯人不識孔子聖人乃曰彼東
家印者吾知之矣莊子讓王篇夫子再逐於魯殺夫子者無罪藉夫子者無禁漢
章賢傳號稱鄒魯大儒子玄成復以明經位至丞相賢薨諡節侯漢韓信傳媼衣
靡食注媼苟且也賈長頭注見十卷贈上天竺辯才詩漢司馬相如傳白質黑章
其儀可喜詩大雅追琢其章金玉其相左傳隱三年苟有明信澗谿治泚之毛可
薦於鬼神可羞於王公左太冲蜀都賦賈實時味王公羞焉詩國風投我以木瓜
報之以瓊瑤漢書貨殖傳魯人俗儉嗇而丙
氏九其家自父兄弟約頗有拾印有取

九日邀仲屯田爲大水所隔以詩見寄次其韻

無復龍山對孟嘉西來河伯意雄夸霜風可使吹黃帽

公自注舟人黃帽土勝水也樽酒那能泛浪花漫遣鯉魚傳尺素却將燕

石報瓊華何時得見悲秋老醉裏題詩字半斜

河伯用莊子秋水篇詳七卷八月十五日看潮詩注杜子美詩纜侵隄柳繫慢卷
浪花浮詩國風尚之以瓊華乎而關子宋之愚人得燕石梧臺之東歸而藏之以
爲大寶杜九日詩老去悲秋強自寬又詩作詩呻吟內墨淡字欹傾

河復 并序

熙寧十年秋河決澶淵注鉅野入淮泗自澶魏以
北皆絕流而濟楚大被其害彭門城下水二丈八
尺七十餘日不退吏民疲於守禦十月十三日澶
州大風終日旣止而河流一枝已復故道聞之喜
甚庶幾可塞乎乃作河復詩歌之道路以致民願
而迎神休蓋守土者之志也

君不見西漢元光元封間河決瓠子二十年鉅野東傾

淮泗滿楚人恣食黃河鱸萬里沙回封禪罷初遣越巫
沈白馬河公未許人力窮薪芻萬計隨流下吾君仁聖
如帝堯百神受職河神驕帝遣風師下約束北流夜起
澶州橋東風吹凍收微淥神功不用淇園竹楚人種麥
滿河淤仰看浮槎棲古木

溝洫志孝武帝元光中河決瓠子東南注鉅野通於淮泗上使汲黯鄭當時與人徒塞之輒復壞後二十餘年歲因以數不登上既封禪巡祭山川其明年乾封少雨乃使汲仁郭昌發卒數萬塞瓠子決河於是上以用事萬里沙則還自臨決河湛白馬玉璧令羣臣從官自將軍以下皆負薪實決河是時東郡燒草以故薪柴少而下淇園之竹以為撻帝悼功之不成作歌曰皇謂河公兮何不仁又曰河公許兮薪不屬卒塞瓠子築宮其上名曰宣防柳子厚詩渡頭水落村徑成掩亂浮槎在高樹

登望拱亭

此詩墨蹟乃欽宗東宮舊藏今在曾文清家宿嘗刻石餘姚縣治東坡題云僕在彭城大水後登望拱亭偶留

此詩已而忘之其後徐人有誦之者徐思之乃知其為僕詩也集中無之以入河復詩後

河漲西來失舊拱孤城渾在水光中忽然歸壑無尋處
千里禾麻一半空

韓幹馬十四匹

二馬並驅攢八蹄二馬宛頸鬣尾齊一馬任前雙舉後
一馬却避長鳴嘶老髯奚官騎且顧前身作馬通馬語
後有八匹飲且行微流赴吻若有聲前者既濟出林鶴
後者欲涉鶴俛啄最後一匹馬中龍不嘶不動尾搖風
韓生畫馬真是馬蘇子作詩如見畫世無伯樂亦無韓
此詩此畫誰當看

韓非子伯樂教二人相踈馬相與之簡子廐觀馬一人舉踈馬其一人從後而循之三撫其尻而馬不踈此自以為失相其一人曰子非失相也此其為馬也踈肩而腫膝夫踈馬也者舉後而任前踵膝不可任也故後不舉王充論衡漢楊翁偉乘蹇馬出遇放馬翁偉謂其御曰放馬曰踈御曰何以知之曰彼罵轎中馬曰蹇此馬亦罵之曰踈其御往視之果踈馬也北夢瑣言浙人劉三復能記三生事云曾為馬馬常思渴望驛而嘶傷其蹄則連心痛漢東方朔傳尻益高者鶴俛啄也杜子美丹青引斯須九重真龍出一洗萬古凡馬空又天育驃騎歌是何意能雄且傑鬣尾蕭梢朔風起

有言郡東北荆山下可以溝畎積水因與吳正

字王戶曹同往相視以地多亂石不果還游聖

女山山有石室如墓而無棺椁或云宋司馬桓

黓墓二子有詩次其韻二首

按公遊桓山記云元豐一年正月己亥春服既成從

二二子云云有詩別見十六卷王注入此悞

側手區區未易遮奔流一瞬卷千家共疑智伯初圍趙

猶有張湯欲漕斜已坐迂疎來此地分將勞苦送生涯
使君下策真堪笑隱隱驚雷響踏車

時河決水方退諺有側手障黃河之語戰國策智子攻趙襄子走晉陽圍而灌之城不浸者三版漢溝洫志有上書欲通漕斜道及漕事下御史大夫張湯言漕水通河斜水通渭皆可以行船漕上以為然拜湯子邛為漢中守發數萬人作漕斜道五百餘里又待詔賈讓言治河有上中下策若乃繕完故堤增卑倍薄勞費無已數逢其害此最下策也

茫茫清泗遶孤岑歸路相將得暫臨試著芒鞋穿犖确
更然松炬照幽深縱令司馬能鑿石奈一作會有中郎解摸
金強寫蒼崖留歲月他年誰識此時心

九域志徐州泗水今呼清河南史顧歡好學而貧夕則燃松節讀書禮記孔子居於宋見桓司馬自為石椁三年而不成夫子曰若是其靡也死不如速朽之愈也三國陳琳為袁紹作檄書言曹操置發邱中郎將摸金校尉所過隳突無骸不露

贈寫御容妙善師

憶昔射策干先皇珠簾翠幄分兩廂紫衣中使下傳詔
 跪奉冉冉聞天香仰觀眩晃目生暈但見曉色開扶桑
 迎陽晚出步就坐絳紗玉斧光照廊野人不識日月角
 彷彿尚記重瞳光三年歸來真一夢橋山松檜淒風霜
 天容玉色誰敢畫老師古寺晝閉一作開房夢中神授心有
 得覺來信手筆已忘幅巾常服儼不動孤臣入門涕自
 滂元老侑坐鬚眉古虎臣立侍一作侍立冠劍長平生慣寫龍
 鳳質肯顧草間猿與麀都人踏破鐵門限黃金白壁空
 堆牀爾來摹寫亦到我謂是先帝白髮郎不須覽鏡坐

自了明年乞身歸故鄉

西京雜記漢昭陽殿織珠為簾左思吳都賦藹藹翠幄爾雅東西廂謂之序楚辭九歌暇將出兮東方照吾檻兮扶桑迎陽禁中門名唐唐儉傳高祖嘗召訪之儉曰公日角龍庭姓協圖讖係天下望久矣漢項羽傳舜重瞳子項羽亦重瞳子史記黃帝崩葬橋山詩國風涕泗沱唐書太宗方四歲有書生相之曰龍鳳之姿天日之表必能濟世安民李揆傳龍章鳳姿尚不見用麀頭鼠目子乃求官耶文房四譜隋僧智永善書人求題頭門限穿穴乃以鐵葉裹之號鐵門限白髮郎用顏駟事詳十一卷董儲郎中詩註杜子美詩上疏乞骸骨黃冠歸故鄉

哭刁景純

刁景純名約丹徒人少卓越刻苦學問能文章始應舉京師與歐陽永叔富彥國聲譽相高下天聖二年登進士第困於為郎施不大耀士友歎惜而景純未嘗以為恨好急人之難海內識與不識多歸之不治產業賓客故人常滿其門尊酒燕娛無虛時重義輕施有古人之風壽八十四

讀書想前輩每恨生不蚤紛紛少年場猶得見此老此
 老如松柏不受霜雪槁直從毫末中自養到合抱宏材

乏近用千歲自枯倒文章餘正始風節貫華皓平生爲
人耳自爲薄如縞是非雖難齊反覆看愈好前年旅吳
越把酒慶壽考扣門無晨夜百過迹未掃但知從德公
未省厭邱嫂別時公八十後會知難保昨日故人書連
年喪翁媪公自注景純妻先亡傷心范橋水漾漾舞寒藻華堂不見
人瘦馬空戀阜我欲江東去匏樽酌行潦鏡湖無賀監
慟哭稽山道忍見萬松岡荒池沒秋草

老子合抱之木生於毫末晉衛玠傳謝鯤稚重玠相見欣然言論彌日王敦曰不
意永嘉之末復聞正始之音再見德公詳見十一卷題藏春塢詩注漢楚元王傳
高祖徵時常避事時時與賓客過其邱嫂食嫂厭叔與客來陽爲羹盡輒釜客以
故去已而視釜有羹由是怨嫂范橋潤州范公橋以文正公得名揚雄方言梁宋
齊楚之間謂漚曰阜唐書賀知章字季真天寶初上章請度爲道士有詔賜鏡湖
剡川一曲李白詩欲向江東去定將誰舉杯稽山無賀老却棹酒船回晉阮籍傳

車迹所窮輒慟哭而返萬松岡在
景純藏春塢見八卷景純見和詩

答呂梁仲屯田

亂山合沓圍彭門官居獨在懸水村

公自注懸水村呂梁地名

居民蕭

條雜麋鹿小市冷落無雞豚黃河西來初不覺但訝清

泗流奔渾夜聞沙岸鳴礮盜曉看雪浪浮鵬鷗呂梁自

古喉吻地萬頃一抹何由吞坐觀入市卷閭井吏民走

盡餘王尊計窮路斷欲安適吟詩破屋愁鳶蹲歲寒霜

重水歸壑但見屋瓦留沙痕入城相對如夢寐我亦僅

免爲魚鼈旋呼歌舞雜詼笑不惜飲醕空餅盆念君官

舍冰雪冷新詩美酒聊相溫人生如寄何不樂任使絳

蠟燒黃昏宣房未築淮泗滿故道堙滅瘡痍存明年勞
苦應更甚我當舂鍤先黥髡付君萬指伐頑石千鎚雷
動蒼山根高城如鐵洪口快談笑却掃看崩奔農夫掉
臂免狼顧秋穀布野如雲屯還須更置軟脚酒為君擊
鼓行金樽

韓退之詩餘瀾怒不已喧聒鳴鶻盜漢嚴延年傳河南天下喉咽地顏師古曰言
其所在襟要如人體之有喉咽也漢王尊傳為東郡太守河水盛溢泛浸瓠子金
堤老弱奔走曾投沈白馬祀水神河伯尊執圭璧使巫策祝請以身填金堤因止
宿堤上堤壞吏民皆奔走唯一主簿泣在尊旁立不動而水波稍却回還杜子美
羌村詩夜聞更秉燭相對如夢寐左傳昭二年劉子曰微禹吾其魚乎禮記盛於
盆尊於錡杜子美遺田父泥飲詩叫婦開大餅盆中為吾取宣房即宣防見本卷
河復詩注又瓠子歌曰鬻桑浮兮淮泗滿謝靈運詩圻岸屢崩
奔軟脚字見唐書楊國忠傳詳五卷監官部役戲呈同事詩注

張寺丞益齋

張寺丞名恕字忠甫文定公安道子

張子作齋舍而以益為名吾聞之夫子求益非速成譬
如遠遊客日夜事征行今年適燕薊明年走蠻荆東觀
盡滄海西涉渭與涇歸來閉戶坐八方在軒庭又如學
醫人識病由飽更風雨晦明淫跛躄瘖盲虛實在其
脉靜躁在其情榮枯在其色壽夭在其形苟能閱千人
望見知死生為學務日益此言當自程為道貴日損此
理在既盈願言書此詩以為益齋銘

左傳昭元年天有六氣淫生六疾氣曰陰陽風雨晦明也分為四時序為五節過
則為災史記扁鵲傳扁鵲望見桓侯而退走曰疾在骨髓雖司命無奈之何互見
四卷和劉道原詠史詩注
老子為學日益為道日損

荅孔周翰求書與詩

身閑曷不長閉口天寒正好深藏手吟詩寫字有底忙
 未脫多生宿塵垢不蒙譏訶子厚疾反更刻畫無鹽醜
 征西自有家雞肥太白應驚飯山瘦與君相從知幾日
 東風待得花開否撥棄萬事勿復談百觚之後那詞一作
 辭酒

史記張儀傳願陳子閉口無復言韓退之詩有底忙時不肯來柳子厚答崔書凡人好辭工書皆病癖也吾不幸益得二病學道以來日思攻鍼攻炭卒不能去吾子乃始飲飲思易吾病不亦惑乎又互見一卷石蒼舒醉墨堂詩注晉周顛傳庾亮謂顛曰諸人咸以君方樂廣顛曰何乃刻畫無鹽唐突西施家雞詳八卷柳氏二外甥求筆跡詩注飯山瘦用李白飯顛山頭詩意詳九卷次韻沈長官注孔叢子昔平原君與子高飲強子高酒曰昔有遺謔堯舜千鍾孔子百觚子路嗑嗑尚飲百榼古之賢聖無不能飲子何辭焉

送李公恕赴闕

君才有如切玉刀見之凜凜寒生毛願隨壯士斬蛟蜃
 不願腰間纏錦條用違其才志不展坐與胥吏同疲勞
 忽然眉上有黃氣吾君漸欲收英髦立談左右俱動色
 一語徑破千言牢我項分符在東武脫畧萬事惟嬉遨
 盡壞屏障通內外仍呼騎曹為馬曹君為使者見不問
 反更對飲持雙螯酒酣箕坐語驚眾雜以嘲諷窮詩騷
 世上小兒多忌諱獨能容我真賢豪為我買田臨汝水
 逝將歸去誅蓬蒿安能終老塵土下俯仰隨人如桔槔

列子湯問篇周穆王征西戎西戎獻銀鍔之劍用之切玉如切泥焉東方朔十洲記亦云呂氏春秋荆有伏飛者得寶劍於江干渡中流兩蛟繞舟伏飛拔劍赴江刺蛟殺之王桑刀銘陸剽犀兕水截鯨鯢在甫大食寶刀詩蒼水使者捫赤條蒼殷浩傳桓温曰浩有德有言向使作令僕足以儀刑百揆朝廷用違其才難退之

鄆城晚飲詩城上赤雲呈勝氣眉間黃色見歸期韓退之淮西碑萬口和附并爲一談事不可破晉阮籍傳文帝輔政籍嘗從容言於帝曰籍嘗遊東平樂其風土帝大悅即拜東平相籍乘驢到郡壞府舍屏障內外相望法令清簡旬日而還馬賈王子猷事對飲用曹參更舍歌呼意持整用畢卓語並見前注漢書張耳傳高祖箕踞罵詈注箕踞者謂曲兩脚其形如箕莊子夫運篇于獨不見夫桔槔者乎引之則俯舍之則仰

春菜

蔓菁宿根已生葉韭牙戴土拳如蕨爛蒸香薺白魚肥
碎點青蒿涼餅滑宿酒初消春睡起細履幽畦掇芳辣
茵陳甘菊不負渠鱸縷堆槃織手抹北方苦寒今未已
雪底波稜如鐵甲豈如吾蜀富冬蔬霜葉露芽寒更苗
久拋松葛猶細事苦筍江豚那忍說明年投劾徑須歸
莫待齒搖并髮脫

禮坊記注葍蔓菁也陳宋之間謂之葍劉夢得嘉話錄諸葛亮所止令軍士獨種蔓菁三蜀之人今呼爲諸葛菜南史周顒傳文惠太子問顒菜食何味最勝顒曰春初蚤韭秋未晚松李白詩不知舊行徑初拳幾枝蕨杜牧晚晴賦雨晴秋容新沐兮折遶園而細履劉禹錫嘉話菜之波稜者本西竺國僧自波稜國將其子來如苜蓿因張鷟而至也韓退之祭十二郎文吾年未四十而視茫茫而髮蒼蒼而齒牙動搖又齒落詩餘在皆動搖盡落應始止

送鄭戶曹

遊遍錢塘湖上山歸來文字帶芳鮮羸僮瘦馬從吾飲

陋巷何人似子賢公業有田常乏食廣文好客竟無羶
東歸不趁花時節開盡春風誰與妍

後漢鄭太字公業結交賢豪家富於財有田四百頃而食常不足唐鄭虔傳玄宗置廣文館以虔爲博士故號鄭廣文在官貧約杜甫戲簡以詩曰才名四十年坐客寒無羶

虔州八境圖八首

虔州八境圖八首并引

南康八境圖者太守孔君之所作也君既作石城
卽其城上樓觀臺榭之所見而作是圖也東望七
閩南望五嶺覽羣山之參差俯章貢之奔流雲煙
出沒草木蕃麗邑屋相望雞犬之聲相聞觀此圖
也可以茫然而思粲然而笑慨然而歎矣蘇子曰
此南康之一境也何從而八乎所自觀之者異也
且子不見夫日乎其旦如槃其中如珠其夕如破
璧此豈三日也哉苟知夫境之爲八也則凡寒暑
朝夕雨暘晦明之異坐作行立哀樂喜怒之接於
吾目而感於吾心者有不可勝數者矣豈特八乎

如知夫八之出乎一也則夫四海之外詭譎譎怪
禹貢之所書鄒衍之所談相如之所賦雖至千萬
未有一不一者也後之君子必將有感於斯焉乃作
詩八章題之圖上

坐看奔湍一作難遶石樓使君高會百無憂三犀竊鄙秦太

守八詠聊同沈隱侯

華陽國志秦孝文王時李冰爲蜀守作石犀牛以厭水精穿石犀谿於江南岸
子美石犀行君不見秦時蜀太守刻石立作三犀牛婺州圖經八詠樓在州南碑
宋沈約文南史沈約諡曰隱集中有東陽八詠

濤頭寂寞打城還章貢臺前暮靄寒劬客登臨無限思
孤雲落日長安

劉禹錫詩山圍故國周遭在湖打空城寂寞回南康記贛縣東南山有臺方數丈有自然霞如屋形章貢臺乃章貢一水合流處李太白詩長雲鳥沒落日孤雲邊白鵲樓前翠作堆縈雲嶺路若為開故人應在千山外不寄梅花遠信來

朱樓深處日微明皂蓋歸時酒半醒薄暮樵漁人去盡

碧谿青嶂遶螺亭

寰宇記昔有貧女暮宿亭採螺見眾螺張口噉其肉貧女死因葬水旁其冢化為巨石號曰螺亭石山在贛縣東南二十里

使君那暇日參禪一望叢林一悵然成佛莫教靈運後

著鞭從使祖生先

大莊嚴論如是眾生者乃勝智叢林一切諸善行運集在其中南史謝靈運傳會稽太守孟顛事佛精懇而為靈運所輕嘗謂顛曰得道應須慧業丈人天生天當在靈運前成佛必在靈運後晉劉琨傳與祖逖為友聞逖被用與親故書曰吾枕戈待旦常恐祖生先吾著鞭

却從塵外望塵中無限樓臺煙雨濛山水照人迷向背只尋孤塔認西東

杜牧之江南春詞南朝四百八十寺多少樓臺煙雨中詩幽風零雨其濛唐皇甫冉詩山川迷向背風霧失旌旗

煙雲縹緲鬱孤臺積翠浮空雨半開想見之罘觀海市絳宮明滅是蓬萊

漢郊祀志八神五曰陽主祠之罘山史記天官書海傍蜃氣象樓臺廣野氣成宮闕之罘在登州海中時時有雲氣如宮室臺觀城堞人物車馬冠蓋歷歷可見謂之海市

回峰亂嶂鬱參差雲外高人世得知誰向空山弄明月

山中木客解吟詩

徐鉉帖鄱陽山中有木客自言秦時造阿房宮者食木實遂得不死時就民間飲酒為詩一章云酒盡君莫沽壺傾我當發城市多驚塵還山弄明月願況集亦云

南康記贛縣東南山上有臺風雨之後景氣
明淨頗聞山上鼓吹聲即山都木客吟唱也

讀孟郊詩二首

夜讀孟郊詩細字如牛毛寒燈照昏花佳處時一遭孤
芳擢荒穢苦語餘詩騷水清石鑿鑿湍激不受篙初如
食小魚所得不償勞又似煮彭蠡竟日嚼空螯要當鬪
僧清未足當韓豪人生如朝露日夜火消膏何苦將兩
耳聽此寒蟲號不如且置之飲我玉色一作醪

杜子美述古詩秦時任商鞅法令如牛毛古樂府艷歌行水清石自見詩國風白
石鑿鑿唐書韓愈一見孟郊為忘形交賈島亦韓門弟子島初為浮屠名無木皆
附愈

我憎孟郊詩復作孟郊語饑腸自鳴喚空壁轉饑鼠詩

從肺腑出出輒愁肺腑有如黃河魚出膏以自煮尚愛
銅斗歌鄙俚頗近古桃弓射鴨罷獨速短蓑一作莎舞不憂
踏船翻踏浪不踏土吳姬霜雪白赤脚浣白紵嫁與踏
浪兒不識離別苦歌君江湖曲感我長羈旅

孟東野詩銅斗飲江酒手拍銅斗歌儂是拍浪兒飲則拜浪婆脚踏小船頭獨速
舞短莎又短蓑不怕雨白露相爭飛短楫畫旗蒲間作豪橫歸笑伊水健兒浪戰
求光輝不如竹枝弓射鴨無是非又射鴨復射鴨鴨驚菰蒲頭鴛鴦亦零落彩色
難相求儂是清浪兒每踏清浪遊笑伊鄉貢郎踏土稱風流如何州角翁至死不
裏頭李白通塘曲浦邊清水明素足別有浣紗吳女郎又越女詞耶婆女郎如
雪屣上足如霜東野詩數年伊洛同一旦江湖非江湖有故莊小女啼嗒嗒

訪張山人得山中字二首

魚龍隨水落猿鶴喜君還舊隱邱墟外新堂紫翠間野
麋馴杖屨一作履幽桂出榛菅灑掃門前路山公亦愛山自公

注張故居為大水所壞
新卜此至故居之東

韓退之詩豈念幽桂遺榛菅
王注山公山簡也公自謂

萬本鎖雲龍公自注天留與戴公路迷山向背人在漢西

東蕭麥餘春雪櫻桃落晚風入城都不記歸路醉眠中

南史戴顓嘗隱京口黃鵠山竹林精舍郡邑志潤州有戴公山注詳八卷同柳
子玉遊鶴林招隱詩杜子美夔州絕句襄東漢西一萬家江南江北春冬花

送孔郎中赴陝郊孔郎中宗翰已見十一卷荆林馬上見寄詩
注此詩疑其自密移陝過徐州與先生會也

驚風擊面黃沙走西出峭函脫塵垢使君來自古徐州

聲震河潼殷關右十里長亭聞鼓角一川秀色明花柳

北臨飛檻卷黃流南望青山如峴首東風吹開錦繡谷

淥水翻動蒲萄酒訟庭生草數開樽過客如雲牢閉口

漢衛青傳大風起砂礫擊面賈誼過秦論秦孝公據崤函之固崤謂二般函謂函
谷關王注古有南徐北徐南徐潤州北徐彭城時自彭城而往故云古徐潼關在
華州華陰縣河水自龍門南流激華山而東故名河潼庾信哀江南賦十里五里
長亭短亭樂府解題橫吹曲有鼓角唐樂令諸道行軍給鼓角三萬人以上角十
四具鼓二十四面襄河記峴山在襄陽下臨漢王注陝
州去郡二十里有山亦名峴以其狀類峴首故得名

與梁左藏會飲傅國博家

將軍破賊自草檄論詩說劍俱第一彭城老守本虛名

識字劣能欺項籍風流別駕貴公子欲把笙歌暖鋒鏑

紅旆朝開猛士噪翠帷暮卷佳人出東堂醉臥呼不起

啼鳥落花春寂寂試教長笛傍耳根一聲吹裂堦前石

晉樂廣傳天下言風流者王樂為稱首庾亮與郭游書別駕任居刺史之生嵇康
傳穎川鍾會貴公子也列石用李善事已見八卷同柳子玉遊鶴林招隱詩注

寒食日答李公擇三絕次韻

從來蘇李得名雙只恐全齊笑陋邦詩似懸河供不辦
故欺張籍隴頭瀧

王注前漢蘇武李陵能詩謂之蘇李唐蘇味道李嶠俱以文章顯時亦號蘇李文
蘇頌李又對掌文誥明皇謂頌曰前此李嶠蘇味道文擅當時號蘇李今有卿及
又何媿前人哉世說郭子玄語議如懸河瀉水注而不竭唐王勃傳張說評
楊炯曰文如懸河之不竭韓退之贈張十八詩君乃崑崙渠籍乃隴頭瀧

簿書磬鼓不知春佳句相呼賴故人寒食德公方上冢
歸來誰主復誰賓

周禮鼓人以磬鼓鼓
役事德公注屢見

巡城已困塵埃昧執扑仍遭蟣蝨緣欲脫布衫攜素手

試開病眼點黃連

公自注來詩謂
僕布衫督役

周禮司空執扑左傳襄十七年宋平公築臺子罕執
扑以行築者而扶其不勉者漢嚴安傳介胄生蟣蝨

約公擇飲是日大風

先生生長匡廬山中讀書三十年舊聞飲水師顏淵
不知治劇乃所便偷兒夜探赤白丸奮髯忽逢朱子元
半年羣盜誅七百誰信家書藏九千春風無事秋月閑
紅粧執樂豪且妍紫衫玉帶兩部全琵琶一抹四十絃
客來留飲不計錢齊人愛公如子產兒啼臥路呼不還
我慙山郡空留連牙兵部吏笑我寒邀公飲酒公無難
約束官奴買花鈿薰衣理鬢夜不眠曉來顛風塵暗天
我思其由豈坐慳作詩媿謝公笑謹歸來瑟縮愈不安
要當啖公八百里豪氣一洗儒生酸

公作李氏山房記云李公擇少時讀書於廬山五老峯下白石菴之僧舍公擇既去而山中之人指其居為李氏山房藏書凡九千餘卷漢尹賞傳薛宣舉賞能治劇又長安中間里少年羣輩殺吏受賂報仇相與探丸為彈得赤丸者斫武吏得黑者斫文吏白者主治喪漢朱博字子元遷邛邪太守奮鬻抵几斥罷病吏詳已見前潘若冲郡閣雅談高從晦好彈胡琴天成中王仁裕使荆渚從晦出十妓彈胡琴仁裕有詩曰紅粧齊抱紫檀槽一抹朱絃四十條史記循吏傳子產治鄭死丁壯號哭老人兒啼後漢侯霸傳為臨淮尹政理有能名更始元年遣使徵霸百姓老弱相攜號哭使者或常道而臥曰願乞侯君復留期年杜子美偪仄行曉來急雨春風顛俗諺有怪值風齊值雨之說韓退之詩瑟縮久不安晉王濟傳王愷以帝舅奢豪有牛名八百里駸常盤其蹄角濟請以錢十萬與牛對射而賭之一發破的因據胡牀叱左右速探牛心來須臾而至一割便去三國志陳元龍湖海之士豪氣不除詳見前卷次韻答邦直詩注

坐上賦戴花得天字

清明初過酒闌珊折得奇葩晚更妍春色豈關吾輩事
老狂聊作坐中先醉吟不耐欵紗帽起舞從教落酒船
結習漸消留不住却須還與散花天

唐白居易傳自號醉吟先生杜子美李尚書聯句數語欵紗帽高文擲綠腰摩經維摩詰室有一天女見諸天人說法即以天花散諸菩薩大弟子上花至菩薩即皆墮地至大弟子便著不墮天女曰結習未盡花著身矣結習盡者花不著也

夜飲次韻畢推官

簿書叢裏過春風酒聖時時且復中紅燭照庭嘶騃裏
黃雞催曉唱玲瓏老來漸減金釵興醉後空驚玉筍工

公自注畢善象月未上時應蚤散免教壑谷問吾公

酒聖用徐邈事詳五卷贈孫莘老七絕詩注漢書音義騃馬也赤喙黑身杜子美詩願隨金駿褭走置錦屠蘇黃雞用白樂天玲瓏歌詳六卷與臨安令宗人同年劇飲詩注唐舒元興玉筍象志秦丞相斯變為頡頏文為玉筍象體尚太古左傳襄三十年鄭伯有嗜酒為窟室而夜飲朝至未已朝者曰公焉在其人曰吾公在壑谷又互見前

古香齋覽賞袖珍施註蘇詩卷之十三



